

# Yohane

## Yeng Yesuac Siduc Gombang Ohoec

---

**1** <sup>1</sup>Hanac hanaheaunacngoc enacyoacngo kefec nga enacyoac ye Anutugoc kefec amma enacyoac ye Anutu. <sup>2</sup>Amma yennoc hanac hanaheau Anutugoc kefec. <sup>3</sup>Nga Anutungo enacyoacfu deu wiac sasawa fingecdaec, wiac sasawa fingecma fekende imoc yea kpac mong mi fingerec. <sup>4</sup>Yearunoc kekec feec nga kekec imocngo ngicngac yeneac kperagi anec. <sup>5</sup>Nga kperagingo kundung mekperagiung kundungngoc kperagi imoc semeudeac ambibiema waec.

<sup>6</sup>Anutungo ngic mong sueu haec, yeac kpara Yohane. <sup>7</sup>Yeng kperagi imocac hepucngic amma dedekperagi imoc ngicngac mekperagiyemmeudeac haec. Yeng ifi hau ngicngac sasawango kperagia imoc negensingegecdeac negenec. <sup>8</sup>Ye yengenaoc kperagi imoc mi kefec, kpac. Ye ine kperagi imoc mekperagiudeac haec.

<sup>9</sup>Anu kperagi fora yombong, yeng bangecfu ngicngac sasawa mekperagiyemmebeso haudeac anec. <sup>10</sup>Anutu ye kperagiango bangec nga wiac sasawa meficgedaru kperagia imocngo bangecfu kefu ngicngac yeneng ine ye mi hensigec. <sup>11</sup>Ye bangehau dzigenemanu arengfora yeneng ama mi heimigec. <sup>12</sup>Nga ngicngac ama heimima kpara negensingegec, yeni Anutuac nambaracfora anggecdeac deyemmeec. <sup>13</sup>Deyemmeu ngicngac imoc yeni ngic sacfusiunac me sebiac songounac me ngic monggac songounac mong mi fingecgec, kpac. Yeni Anutu yengenaarunac fingecgec.

<sup>14</sup>Anu enacyoacngo sebifusiagoc amma botucninau kefec. Kefu medac mocgungo fingecma Manggacarunac kuc nga kibikperagia mekefec, kuc nga kibikperagia imocnoc hening. Henni yearu danggunuc nga yoac fora wake wakea fede.

<sup>15</sup>Yohanengo yeac hepuc amma dekperagima kpacma yofi deec, “Ni yeacnoc yofi deai, ngadenau hama kecde, ye kunenna, nocac ni

mi fingebarengoc ye kechakefec.”<sup>16-17</sup> Dedeseriyoacngo Mosegoc hau yearunac meing nga danggunuc amma yoc fora imoc Yesu Kristogoc haec. Amma ye danggunuc hafoangoc femide, imocngo nenannu wisic wisickea kpac hakecede.<sup>18</sup> Ngic mongngo Anutu mong mi henec, kpac. Medaha mocgusac Mamaac hoannu kecande, ye Anutungoc. Yeng Manggac dekperaginemmeec.

<sup>19-20</sup> Yudangic Yerusareng taonnu kecgec, yeneng womong gareng nga womong gareng yeneac memefic sueyunugec Yohanearu kemma kpesimigec, “Ge merac?” kpesimigec, yeng haniaya mi hesonggema yofi dekperagiyemmeec, “Ni Messia kpac.” imocngo Yohaneac dedekperagi.<sup>21</sup> Ifi deu yeneng monggoc kpesimigec, “Ge merac, ge Eria me?” kpesimigec yeng deec, “Ni ye kpac.” deu degec, “Ge profete yombong me?” degec merenec, “Kpac.”<sup>22</sup> Ifi deu degec, “Anu ge merac? Suenunuda, yenearu yoc turunga dafi mekemma edeyununide? Ge geangaac dafi deannec?”<sup>23</sup> Ifi degec Yohanengo yofi merenec,

“Bangeb kisiu ubaudumeng fingerec imoc nennoc yofi kpacduae,  
‘Ngeni KEBUAC sing heitumeigec.’

*(Yesai 40:3)*

Profete Yesaiango neac ifi deec.”

<sup>24</sup> Anu farisaio yeneng ngic goa sueyunugec kemma <sup>25</sup> Yohane kpesimigec, “Ge Messia kpac nga Eria kpac amma profete kpac. Ge nocac ngic doku nadzicyemmeannec?”<sup>26</sup> Ifi degec Yohanengo yofi merengyemmeec, “Ni doku nadzicngemmeanduae. Nga botucnginau ngic mong kecede, ngeni ye mi negemmidae.<sup>27</sup> Yeng ngadenau hama kecede nga ni ifiango yeac hanitabe witiha yungecba naric mi ngereude.”<sup>28</sup> Yohanengo Betania amau Yordang doku nobocgengau doku nadzicyemmekefec, imohai faka imoc fingerec.<sup>a</sup>

<sup>29</sup> Wereckengau Yohanengo namma henu Yesungo yearu hau ngicngac yofi edeyunuec, “Henggec, imoc Anutuac ramamedaha, yeng bangectoa bangeb imocac ngicngac sasawa yeneac kopocsic meickeude.”<sup>30</sup> Yeacnoc negemma yofi deai, “Ngc mong ngadenau hama kecede, yeng ni mi fingebare bicngoc yombong kefecac ni feracnude.”<sup>31</sup> Neng ye mi negemmi. Nga isaengicngac ngeneng ye hentegecgedeac neng hama doku nadzicngemmebade.”

<sup>32</sup> Yohanengo yofi dekperagiec, “Ni Tiri Asu hembra yeng kebesacac siric isoc kurumennunac mama yeac witiu taru henai.”<sup>33</sup> Nga ni ye mi negemmibare suenuc, yeng yofi edenuc, ‘Asungo mama ngic yearu taru hennade, yeng Tiri Asungo nadzicngemmeude.’<sup>34</sup> Ni imocnoc hemma hepuc amma yofi dekperagiai, ngic yomocngo Anutuac medac.”

<sup>35</sup> Anu wereckengau Yohane ye medacfora yenearu yohockang yerigoc imohai monggoc nanggec.<sup>36</sup> Nammagec Yesungo kenu hemma

<sup>a</sup> 1:28 Betania ama yohockang feoc. Mong Yerusareng wegana nga mong Yordang wegana.

medahora yofi edeyuruec, “Henec, imoc Anutuac ramamedaha.”  
 37-38 Ifi deu negemma medahora yereng Yesu modacma kenec Yesungo dzigene yeremma yofi kpesiyemerec, “Ngeri noc wiacac angecmede?” kpesiyemeru deoc, “Rabbi, (imocac titiha kpoukpou) ge dahai kecne?”  
 39 Deec yofi edeyuruec, “Ngeri hama henec.” ifi deu yeni yenhafoc kemma ama kefec, imoc hemma wenac imoc yegoc taroc. Faka yomoc marai 4 kiroc fingerec.

40 Anu Yohaneac yoac negemma Yesu modaroc, yerearunac mong Anderea, Simong Petoroac munea. 41 Yeng Yesu hemma dzigenema warac warac yengena munea Simong meficgema yofi edeec, “Neri Messia meficgedic.” (Messia imocac titiha Kristo.) 42 Ifi dema Simong hesickeu Yesuaru kenec Yesungo ye hemma yofi deec, “Ge Simong Yohaneac medac, geac kpacga Kefa debesonga.” (Imocac titiha hoc amma grikyoacfu Petros.)

43 Wereckengau Yesungo Gariraia bangecfu kembesonga negemma Firipo meficgema yofi edeec, “Ge hama modacnuna.” 44 Nga Firipo nga Anderea amma Petoro yeni Besaida taonnunac.

45 Anu Firipongo Natanae meficgema yofi edeec, “Mosengo dedeseriyoac kibiuh ohoec nga profete yeneng ifingoc ohogec, neni ngic imoc meficgeding. Imoc Yesunoc, Yosefeac medac, Nadzarete taonnunac.”  
 46 Ifi deu Natanaengo deec, “Nadzarete taonnunac wiac gombunga mong mi fingecande.” ifi deu Firipongo deec, “Ge hama henna.”

47 Nga Yesungo Natanae henu yearu kenu yofi deec, “Henggec, ngic yomoc isaengic fora, yearu ikoc nga faitobang faka mong mi fede.” 48 Ifi deu Natanaengo kpesimiec, “Ge dafi negennunec?” Ifi deu Yesungo yofi edeec, “Firipongo mi kpacgumanu fig ic haniau tacmana bic gendua.”  
 49 Ifi deu Natanaengo yofi edeec, “Rabbi, ge Anutuac medac, Israe neneac Ngictau.” 50 Ifi deu Yesungo yofi meremmiec, “Ge fig ic haniau tacna gendua deduaeac negensinnunec. Kecma faka yofia monggoc ferahema fingeru hennade. 51 Negenggec, kurumeng anggeu ngeni Anutuac angerofora yeneng Ngicac Medac yearu engemmama anggec yenenggecde, imoc fora yombong edengunuduae.”

**2** 1 Uameme yohockang wisickeu Gariraia bangecfu Kana taonnu memeturang fingerec. Nga Yesuac nonggea ihai kecmanu 2 Yesu nga medacfora momoc heitaiyunugec. 3 Nga yeni waingngina kpac anu nonggeango Yesu edeec, “Waingngina kpac ande.” 4 Ifi deu Yesungo yofi edeec, “Ngac, neac wiac imoc geac mi ande, nasona mi hadacngoc.” 5 Ifi deu nonggeango uamedac edeyunuec, “Yeng wiac monggac edengunuu ngeni imoc sasawa tofohobisia.”

6 Anu yudangic yeni dzuac dzuac fakangina modacma enang dokuyagoc faigec tacande. Imocac amma imohaingoc enang hocngo memea 6 faigec tarec. Enang mocgu mocgu imoc 100 lita, ifingo

tackenec. <sup>7</sup>Nga Yesungo uamedac yofi edeyunuec, “Ngeni doku fima enannu kpakegec kemema wakeu.” ifi deu yeni doku figec kemema wakedarec. <sup>8</sup>Figec wakeu yeng yofi edeyunuec, “Ngeni yaguc fima imoc yakagarenggaru mekenggec.” Ifi deu fima mekenggec. <sup>9</sup>Mekemmagec dokungo waing anu yakagarengo imoc nehemma waing dahacnac dema obohous uamedac doku fima mekenggec, yenengsac negenggec. Ifi nehemma yakagarengo memeturangngic, ye deu haec. <sup>10</sup>Hau edeec, “Fakanina yofi fede, hanahema waing gombunga ngic gumecyununi nekecma ubasufu anggec waing songea kpac gumecyunuandimbe. Anu geng ine waing gombunga mesufuna tacdacac yaguc meficgenec.”

<sup>11</sup>Yesungo Gariraira bangecfu Kana taonnu kecma negensinggegecdeac faka kuhagoc imoc hanahema meec. Mema kuc nga kibikperagia ifi mekperagiu medacfora yeneng imoc hemma ye negensinggegec.

<sup>12</sup>Kecgec wisickeu Yesu nga nonggo munafora amma medacfora yenhafoc Kafanaung taonnu kemema ihai wenac goa kecgec. <sup>13</sup>Kecgec yudangic yeneac makekenggac naso wegene hau Yesungo Yerusareng taonnu enec. <sup>14</sup>Emma henu ngic yeneng womonggac oda manau ramaburumaka nga kebesacneng faigec nga goa tatacnginau tacma hiedzo emekecmagec Yesungo yenenec. <sup>15</sup>Yenemma indzuru mong mudze mudzea mema imocngo ngic sasawa ramaburumakanginagoc womonnunac yunukisang ayemmeu kemegec. Kememagec ngic hiedzo emekecgec, yeneac dzongina megigi amma tebongina heimerenec. <sup>16</sup>Heimeremma ngic kebesacneng suegec, yeni yofi edeyunuec, “Ngeni wiacngina imoc meickegec! Ngeni Mannaac ama anggec emekpesi ama mi ambeso.” <sup>17</sup>Faka imoc fingeru medacfora yeneng yoc mong oho ohoya feec, imoc negensigec,

“Geac amaac amma herenango gerec dzema dzendandannuude.”

*(Mitiyegec 69:9)*

<sup>18</sup>Amma yudangic yeneng meremma edegec, “Ge faka imoc andanggac noc faka kuhagoc mena hemma negensinggenide?” <sup>19</sup>Ifi degec Yesungo meremma yofi edeyunuec, “Ngeni womong yomoc hembarackegec ni uameme harebecfu imoc miacbade.” <sup>20</sup>Ifi deu yudangic yeneng degec, “Ngc yeneng womong yomoc kifa 46 mekecma medzickegec. Anu geng uameme harebecfusac naric miacnade me?”

<sup>21</sup>Yesungo ine yengena sebiaac womonnu yoc heima deec. <sup>22</sup>Kecma homecfunac megboriu yaru medacfora yeneng Yesungo yoc ifi deec, imoc negensigec. Negensima mitikibiu yoc oho ohoya fede nga Yesuac yoc momoc negensinggegec.

<sup>23</sup>Anu Yesungo Yerusarennu makekenggac hombang naso femanu ihai kecma faka kuhagoc meu ngicngac homacngo hemma yeac kpara negensinggegec. <sup>24</sup>Nga Yesu yengenaoc ngicngac haifakangina hentegecdarecac amma ubakeraha mong mi edeyunuec. <sup>25</sup>Imoc yofiac, ye

yengenaoc ngic yeneac ubaherenginau wiac sasawa fede, imoc negenecac ngic monggac haniaac ngic mong mi kpesimiec.

**3** <sup>1</sup>Farisaiongic mong kpara Nikodemo, ye yudangic yeneac ngickiwa mong kefec. <sup>2</sup>Nga yeng tofocnac dzongiau Yesuaru hama deec, “Rabbi, geng Anutuarunac mama kpoukpou ua mekecne, imoc negendimbe. Geng faka kuhagoc meanne, ua ifia ngic mongngo Anutuya kpac kecma naric mi mebac.” <sup>3</sup>Ifi deu Yesungo yofi meremmiec, “Foracngoc, ngic mong ye fingec fingec gboria mi fingerude, yeng Anutuac eucerereng naric mi henude, imoc edeguduae.”

<sup>4</sup>Ifi deu Nikodemongo deec, “Ngic bic yadi yadiyango dafi monggoc fingerude? Ye nonggeaac heremanau naric mi enude nga monggoc naric mi fingerude.” <sup>5</sup>Nga Yesungo yofi meremmiec, “Foracngoc, ngic mong ye dokuu nga Asuu gboria mi fingerude, yeng Anutuac eucererennu naric mi enude, imoc edeguduae. <sup>6</sup>Nga ngicfunac fingec fingera, yeng ngic siricngoc nga Asuunac fingec fingera, ye Asu siricngoc. <sup>7</sup>Ngeni fingec fingec gboriau fingecgecdeac edeguba mi kpidohona. <sup>8</sup>Firanggo yengena songo modacma kpeu udumenga negenganne. Nga ye dahacnac hade amma dahai kenude, imoc ine mi negenne. Ngicngac Asuunac fingec fingera, yeni sasawango siricngina ifia.”

<sup>9</sup>Ifi deu Nikodemongo meremmiec, “Yoac sasawa denec, imoc dafi fingecdarude?” <sup>10</sup>Ifi deu Yesungo meremma yofi edeac, “Ge isaengic yeneac kpoukpoungi wiac imoc dafi mi negentegecne? <sup>11</sup>Foracngoc, neni wiac hengandimbe nga negengandimbe, neni imocac hepuc nga dedekperagingic amma dekperagingemmeandimbe, imoc edeguduae. Anu ngeni yoac imoc mi mema honggeandae. <sup>12</sup>Ni bangecac wiacac yoac dema edengunuba ngeni mi negensinggecde. Nga kurumenggac wiacac edengunubadeu ngeni imoc dafi negensinggecde? <sup>13</sup>Ngic mongngo kurumennu mi enec. Ngicac medac kurumennunac maec, ye mocgungo kurumennu enec.

<sup>14</sup>Mosengo bangec kisiu boudzoc miaru nanec, ngic yeneng ifi isoc Ngicac Medac miacgec nambeso. <sup>15</sup>Anu ngicngac ye negensinggecde, yeni sasawango kekecseri megecde. <sup>16</sup>Imoc yofiac, Anutungo bangectoa bangecfu ngicngac ngeneac noc isoc ammiecac Medaha mocgu faiu bangecfu maec. Imocac ngic mongngo ye negensinggeude, ye manganau mi kemeude yeng ine kekecseri meude. <sup>17</sup>Anutungo Medaha bangecngic manganangina isinggema desiudeac sueu mi maec, kpac. Ye bangecngic ebicfunac mesiyunuu komoc kpegecdeac bangecfu sueu maec. <sup>18</sup>Amma ngic mong Medaha negensinggede, ye yoacfu mi faiude. Nga mong ye Anutuac Medaha mocguac kpara mi negensinggede, yeng ine mi negensinggeecac amma yoacfu bic makpeec.

<sup>19</sup>Yoacninaac desi desiac hania imoc yofi, kperagingo bangecfu hau ngicngac angammemengina manganaac amma kundunggac songo

monggoc negemma kperagia wagec. <sup>20</sup>Ngicngac faka mangana angandae, yeni fakangina mangana didiu mi fingectegerudeac sasawango kperagia ngadehema kperagiau naric mi hagecde. <sup>21</sup>Nga ngic mong ye faka fora meande, yeng kperagiau naric haude. Amma ye Anutuac kucfu uaya meande, imoc fingectegerude.”

<sup>22</sup>Kecma Yesu nga medacfora Yudaia bangecfu kemma ihai yenigoc kecma ngicngac doku nadzicyemmegec. <sup>23</sup>Naso imohai Saring taong wegenacfu Ainong taonnu doku homac fec. Imocac Yohane ye ifingoc ihai kecmanu ngicngac yearu kenggec yeng ifingoc doku nadzicyemmekefec. <sup>24</sup>Faka imoc Yohane witicamau mi faimagec fingerec.

<sup>25</sup>Anu Yohane medacfora nga yudangic mong, yeni yuda yeneac dzuac dzuac fakanginaac amma yoacngina engemmama anec. <sup>26</sup>Anu medac yeneng Yohanearu kemma edegec, “Rabbi, ngic gegoc Yordang nobocgeng kefec geng yeac hania edenununec, yennoc ngicngac doku nadzicyemmeu sasawango yearu kendacdae.” <sup>27</sup>Ifi degec Yohanengo yofi merengyemmeec, “Anutungo kurumennunac wiac mi miudeu ngicngo imoc naric mi meude. <sup>28</sup>Ni Messia kpac. Ni ine yeac singwarac ambadeac Anutungo suenuu hayai. Imocacnoc bic edengunuai, ngeni dedena imoc negendaeac hepucna naric anggecde.

<sup>29</sup>Ngic enembingehagoc yeng ngacfu kenude. Anu ngicac ogeango yeac enacfunac memeturangac siduha negemma ubangerectoa negenude. Nga ni ifi isoc yaguc ubangerec hafoangoc negenduae. <sup>30</sup>Yeac kpacsiducngo yadiu neacngo mamea ambeso.

<sup>31</sup>Wihacnac maec, yeng wiac sasawaac engenatoa ande. Nga ngic bangecfunac fingec fingera, yeng bangecfunac, imocac amma bangecac yoac deude. Kurumennunac maecngo wiac sasawaac buma anec kecde. <sup>32</sup>Amma yeng wiac wi fede, imoc hennegeng angkefec, imocac hepuc amma dekperagiu ngic mongngo yeac yoac mi hoanggeude. <sup>33</sup>Anu ngic mong ye yoac imoc mema hoanggeude, yeng Anutu ye fora, imoc deseriude.

<sup>34</sup>Anutungo ngic suec ye Anutuac yoac deude. Imoc yofiac, Anutungo Tiri Asu hendzicma nobohasac kpeteagoc mema mi yemmeude, kpac. <sup>35</sup>Manggacngo heregoc Medahaac songo negemma wiac sasawa mariaui faiec. <sup>36</sup>Imocac Medaha negensinggede, ye kekecserigoc kefude. Nga Medahaac yoac kpeude, ye kekec mi henu Anutuac turung ine yearu fekefude.”

**4** <sup>1</sup>Farisaio yeni Yesuac yofi negenggec, “Yeng habu meyunuma doku nadzicyemmeu Yohaneac habu kpetea ferahede.” <sup>2</sup>Nga Yesu yengenaoc ngicngac doku mi nadzicyemmeu medacfora yeneng doku nadzicyemmegec. <sup>3</sup>Nga Yesungo yoac ifi negemma Yudaia bangec wama Gariraia bangecfu monggoc dzigeneec.

<sup>4-5</sup>Ihai kemma Samaria bangec ferecgebeso amma Samariaac taong mong kpara Sika, ihai kensikeec. Sika taong imoc Yakobongo medaha

Yosefeac bangec desimiec, imocac wegenac tarec. <sup>6</sup>Anu Yesungo Yakoboac dokuteng tarecfu, imohai sing kengkecma kuha kpac anu dokuteng imocac tegiau mama tarec. Tacmanu 12 kiroc isoc anec.

<sup>7-8</sup>Anu medacfora yeni yaka bummegecdeac taonnu kemmagec samariangac mongngo doku fiudeac hau Yesungo yofi edeec, “Doku mehana neba.” <sup>9</sup>Ifi deu ngacngo deec, “Ge yudangicngo dafi samariangac nearu dokuac denec?” Yudangicngac yeni samariangicngac yenigoc emenecngina mi feecac ngacngo ifi deec.

<sup>10</sup>Ifi deu Yesungo yofi edeec, “Ge Anutu haringaac hania nga merang dokuac kpesigende, imoc negentegecma kpesimibang debac yeng doku kekehagoc gembac.” <sup>11</sup>Ifi deu ngacngo deec, “Kebu, ge doku finadeac wiaca kpac nga dokuteng imoc herea anu doku kekehagoc dahacnac finade? <sup>12</sup>Bangecnina Yakobongo dokuteng yomoc menemmeec. Geng ye ferahenec me? Ye yengena nga medacfora amma ramaburumakafora, yeni doku yomohanac nekecgec.”

<sup>13</sup>Ifi deu Yesungo yofi meremmiec, “Ngicngac doku yomoc neandae, yeni sasawango dokuac monggoc ayemmeande. <sup>14</sup>Nga mong ye neng doku miba neude, yeng dokuac monggoc mi ammibesande. Nga doku mibade, imocngo yearu dokukiwa sike sikea fingecma kekecseri meficgemiude.” <sup>15</sup>Ifi deu ngacngo deec, “Kebu, ge doku imoc nenna nema dokuac monggoc mi anembeso nga doku fibadeac yomohai monggoc mi habesare.”

<sup>16</sup>Ifi deu Yesungo yofi meremmiec, “Ge kemma ewega dena haec.” <sup>17</sup>Ifi deu ngacngo deec, “Ni ewena kpac.” deu Yesungo yofi edeec, “Ni ewena kpac, ge fora denec. <sup>18</sup>Ge ngic 5 bic meyununec nga ngic yofinenggac mena ngerahafoc kecdape, ye geac ewega kpac.” <sup>19</sup>Ifi deu ngacngo deec, “Kebu, ge profete, imoc gentegecduae. <sup>20</sup>Kisicfocnina yeneng tikibuma yomohai Anutu afehekecgec. Anu ngeneng yofi deandae, ‘Yerusareng, imohaisac Anutu afehebesonga.’”

<sup>21</sup>Ifi deu Yesungo yofi edeec, “Ngac negensinnuna, naso mong wegeneude, imohai ngicngac ngeneng tikibuma yomohai nga Yerusarennu Anutu monggoc mi afehegecde. <sup>22</sup>Ngeni wiac hania mi negentegecdae, imoc numumidae. Ebicfunac mesi mesi nga komoc kpegecdeac kuc, imoc yudangic nenearunac fingerec nga Anutu negengireckema numumima kecdimbe.

<sup>23</sup>Naso mong hama kecde nga bic hadac, imohai ine dedengerec ngicngac fora, yeni ongaasungina forango Manggac dengeregecde. Manggacngo nunumu areng ifia yeneac negenu ngereeuide. <sup>24</sup>Anutu ye Asu. Imocac amma ngicngac dengerebesonga dema ongaasungo nga faka forau dengerebisia.” <sup>25</sup>Ifi deu ngacngo deec, “Messia, kpara mong Kristo deandae, ye fingerudeac dedea, imoc negenduae. Yeng hama wiac sasawa dekperaginemmeude.” <sup>26</sup>Ifi deu Yesungo yofi edeec, “Yoaac edeguduae, imoc ni.”

<sup>27</sup>Ifi demanu medacfora yeneng amaunac dzigene hagec. Hama Yesungo ngacgoc yoac denegeng anocac hemma kerectegec anggec. Amma mongngo yofi mi kpesimiec, “Ge noc wiacac kpesiminec me yegoc noc wiacac dedape?” <sup>28</sup>Anu ngacngo Yesuac yoac negemma enanga wama amau dzigene kemma amafora edeyunuec, <sup>29</sup>“Ngeni hama henggec. Ngic mong ni faka anai meai, imoc seng deficnudacde. Ye Messia gedang?” <sup>30</sup>Ifi deu yeneng taong wama Yesuaru hagec.

<sup>31</sup>Anu medacfora yeneng yaka neudeac yofi degec, “Rabbi, ge yaka nena.” <sup>32</sup>Ifi degec yeng yofi edeyunuec, “Yaka fenende, imoc ngeni mi negendae.” <sup>33</sup>Ifi deu medacfora yenaocngoc denegeng amma degec, “Ngc mongngo yaka meha migec nedac gedang.”

<sup>34</sup>Ifi degec Yesungo yofi edeyunuec, “Suenuec, yeac enac tofohoma uaya mekecma mesibade, imocngo yakana ande. <sup>35</sup>Ngeni yofi deandae, ‘Afo 4 wisickeuguc semeng fora anude.’ Neng yoac mong deba negenggec, ngeni kicngina fima uau henggec, yaka bic fora amma kpekpauca fede. <sup>36</sup>Ifi anu heihomec nga kmememengic yeri yerahafoc ubangerec negeneceac kmememengicngo uayaac bung mema kekecseriac fora ifingoc mekpedzuc anude.

<sup>37</sup>Nga, ‘Ngc mongngo wiac homeru mong ye fora mekpedzuc anude.’ yoac ifi deandae, imocac foranoc fingece. <sup>38</sup>Ngc goa yeneng ua megec ua imocac fora fingerec. Nga ngeni heihomec mi ammagec ni suengunuba fora mekpedzuc ambisia. Ngeneng yeneac ua torokpema tigece enec.”

<sup>39</sup>Samariangacngo Yesuac yofi dekperagiyemmeec, “Yeng ni faka anai meai, imoc seng deficnudacde.” ifi deecac taong imohacnac samaria ngicngac yeneanac homacngo Yesu negensinggece. <sup>40</sup>Imocac amma samariangicngac Yesuaru kemma yeng yenigoc kefudeac heitaigece. Heitaigece yeng negengyemmema wenac yohockang yenigoc kefec. <sup>41</sup>Yesungo ihai kecmanu homacngo yombong yeac yoacac amma negensinggema <sup>42</sup>ngac edegec, “Neni warac geac siducac amma negensinggeding. Nga yaguc nenaoc yeac enacfunac yoara negemma negensinggedimbe. Amma gennoc bangecngic sasawa neneac memengerec ngic, imoc negendimbe.”

<sup>43</sup>Anu uameme yohockang wisickeu Yesungo Samaria bangec wama Gariraia bangecfu kenec. <sup>44</sup>Ye ihai kemma yengenaac yofi dekperagiemeece, “Profete mongngo yengena bangecfu kefu ngicngac yeneng ewehihei mong mi ammigece.”

<sup>45</sup>Anu gariraianic yeni makekenggac nasou Yerusareng taonnu kenggec Yesungo faka sasawa meu henggecac amma Gariraia bangecfu kenu amafora yeneng ubangerecgec heitaigece. <sup>46</sup>Heitaigece Yesungo Kana taong Gariraia bangecfu doku merennu waing anec, ihai monggoc dzigene kenec. Kenu ihai ngictauac kia mong haec, yeac medacngo Kafanaung taonnu hafei fec. <sup>47</sup>Nga kiango Yesu Yudaia bangecfunac



dzigenema Gariraia bangecfu hade, ifi negemma yearu kemma medaha mengereudeac edeec, nocac medaha homebeso anec. <sup>48</sup>Ifi deu Yesungo yofi edeec, “Ngeni faka kuhagoc nga faka morora mi hemma eng mi negensingegecede.” <sup>49</sup>Ifi deu kiango deec, “Kebu, ge bic hana, medacna homebeso ande.” <sup>50</sup>Ifi deu Yesungo yofi edeec, “Ge kenna, Medacga bic ngereedac kecede.” ifi deu ngic ye Yesuac yoac negensinggema dzigene kenec.

<sup>51</sup>Dzigene kememanungoc wanacngicfora yeneng hama sinnu meficgema edegec, “Medacga bic ngereedac kecede.” <sup>52</sup>Ifi edegec, ye ngereec, imocac nasoyomboggac kpesiyemmu yeneng degec, “Worang hadzing 1 kiroc, imohai sebua nomanedac.” <sup>53</sup>Ifi degec mamango negensiec, “Yesungo naso imohainoc suenuma dedac, ‘Medacga ye bic ngereedac kecede.’” Ifi negemma siduc edeyunuu ye nga wiacfora yeni Yesu negensingegec. <sup>54</sup>Yesungo Yudaia bangecfunac Gariraia bangecfu dzigene hama negensingegecedeac faka kuhagoc meu imocngo naso yohockang anec.

**5** <sup>1</sup>Imocac ngadeau yudangic yenang hombang mong hau Yesungo Yerusarennu anec. <sup>2</sup>Emma Yerusareng taonnu nagutoa mong kpara Ramaac nagu, imocac nobohau dzohong mong fec. Imoc hebiraio yoacfu Betesida deandae, imocac tegiau firangama 5 tackenec. <sup>3-4</sup>Anu firangama imocac manau ngicngac hafeinginagoc nga kicpisc amma goa hanimangang nga puringa ifia homacngo fekenggec, yeni doku kockpac anudeac tomai fegec. Imoc yofiac, naso goau Kebuac angero mongngo doku imohai haande. Hau doku kockpac anu mong ye waraima dokuu kemedede, yeng hafeia sasawa kpac angande.

<sup>5</sup>Anu ngicngac fekenggec, yeneac botucfunac ngic mong puringa kefu kifa 38 bic anec, yeng ihai fekefec. <sup>6</sup>Nga naso herea ihai fekefecac Yesungo hemma imoc negemma yofi kpesimiec, “Ge ngereebesoo anggende me?” <sup>7</sup>Ifi deu puringngo meremmiec, “Kunenna, doku kockpac ammanu merac ngicngo meficnuma dzohonnu fainubac. Ni kemebeso ambare mongngo hefacnuma kemeande.” <sup>8</sup>Ifi deu Yesungo yofi edeec, “Ge yacma fefega mema kenna.” <sup>9</sup>Ifi deu ngic ye naso imohaingoc sebua ngereeu yacma fefega mema kenec.

Nga naso imoc ine sabata naso anec. <sup>10</sup>Anu yudangic yeneng ngic ngereec hemma edegec, “Yaguc sabatanasou fefega mema kenna, imoc singngo mi dede.” <sup>11</sup>Ifi degec merengyemmec, “Ngic mengerenudac, yeng suenuma dedac, ‘Ge fefega mema kenna.’” <sup>12</sup>Ifi deu kpesimigec, “Merac ngicngo fefega mema kenna.” dedac? <sup>13</sup>Nga ngic ngereec ye merang mengereec, imoc mi negenec nocac Yesungo ngichabutoa nanggecac, ihai kemma kperucgeec.

<sup>14</sup>Anu imocac ngadeau Yesungo ngic imoc womong manau meficgema yofi edeec, “Ge sebua bic ngereedac. Nga ebic mong kunengngoc

fingecgembacac kopocsic monggoc mi meficgebesena.” <sup>15</sup>Ifi deu ngicngo kemma yudangic edeyunuec, “Ngic mengerenudac, imoc Yesu.”

<sup>16</sup>Yesungo sabata nasou ua ifia mekefecac yudangic yeneng ngaba seria ammigec. <sup>17</sup>Yesungo yofi merengyemmeec, “Mannango uaya mehakefec nga yofinenggac medengoc imocac amma neng ifingoc ua mekecduaengoc.” <sup>18</sup>Ifi amma Yesungo sabatanasoac singyoac memanganeecc nga torokpema Anutuac Manna dema ye isocngoc anec, imocac amma yudangic herengina monggoc yaru Yesu kpehomebeso anggec.

<sup>19</sup>Ifi anggec Yesungo yofi merengyemmeec, “Foracngoc, Mamango ua mong meu Medacngo imoc hemma yengenaoc ua imocsac naric meude, imoc edengunuduac. Mamango ua mede, Medahango ua imocngoc meude. <sup>20</sup>Imoc yofiac, Manggac ye Medaha songogoc hoanggema ua mede, imoc sasawa edzahekecde. Nga ua sasawa meu hengandae, imocac engenatoa edzaheu meu ngeni imoc hemma kerectegec anggecde. <sup>21</sup>Manggacngo ngic homemea midiyunuma megboriyunukecde, ifi isocngoc Medacngo ngic megboribeso negemmiu ngereeu megboriude. <sup>22-23</sup>Manggacngo ngic angammemengina mi desiude, kpac. Ngic sasawango Manggac eweheimiandae, ifi isoc Medac eweheimigecdeac yeng desi desiua Medahaac mariu faidarec. Nga ngic mong ye Medahaac eweheihei mi ammiande, yeng Manggac sueec, ye ifingoc eweheihei mi ammiude.

<sup>24</sup>Foracngoc, ngic mong ye neac yoac negemma Manggac suenuec, ye negensinggeude, yeng kekecserigoc kecma yoacfu mi enude, imoc edengunuduac. Yeng homec wama kekecfu bic endac. <sup>25</sup>Foracngoc, ngicngac bic homegec, yeneng Anutuac Medacac ubaudumeng negemma kekec megecde. Naso imoc haude nga yaguc bic hadac, imoc edengunuduac. <sup>26</sup>Manggac yengenaaru kekec fede, siriha imocngoc yeng kekec Medac miu Medacaru ifingoc kekec fede. <sup>27</sup>Nga Medaha ye Ngicac Medac, imocac amma Manggacngo ngic isingyunuma desiyunuudeac kuc miec.

<sup>28-29</sup>Ngeni yoac imocac kerectegec mi ambisia. Imoc yofiac, ngicngac kicsereu fedae, yeni sasawango naso mong hau ubaudumenga negemma kicsereunac eregecde. Faka gombunga angkecma homegec, yeni kekec megecdeac yacgecde. Nga faka mangana angkecma homegec, yeneng yoacfu nanggecdeac yacgecde. <sup>30</sup>Ni wiac mong neanna ubaac naric mi mebade, kpac. Ni wiac kedzacnango negemma negenganduae, imocac siriha fakangina isinggema desibade. Neanna songo mi modacanduae, kpac. Suenuec yeac songo modacbade. Imocac amma neac desi desiuango dindingac ande.

<sup>31</sup>Ni neannaoc haniana dekperagibadeu dedekperagina imocngo fora mi anude, kpac. <sup>32</sup>Mongngo neac hepuc amma haniana dekperagiande.

Nga yeng neac hanianaac wiac dekperagiande, imocngo fora ande, imoc negenduae.

<sup>33</sup>Anu ngeni ngic goa sueyunugec Yohanearu kenggec, yeng yoac foraac hepuc amma imoc dekperagiyemmeec. <sup>34</sup>Ngic mongngo neac dedekperagi naric mi deude, kpac. Ngeni ebicfunac mesingunuba komoc kpegecdeac yoac yomoc edengunuduae. <sup>35</sup>Yohane ye siriha yofi, kifa mong dzema mekperagingunuande, ye ifi isoc anec. Mekperagingunuu ngeni naso wegenanec kperagi imocac songo negemma kperagia imohai kegec.

<sup>36</sup>Ni neannaoc dedekperagi metacduae, imocngo Yohaneac dedekperagi ferahede. Nga Manggacngo uaya mema mesibadeac nenec. Amma ua mekecduango hepucna amma Manggacngo suenuec imoc dekperagiude. <sup>37-38</sup>Amma Manggac suenuec, yennoc hepucna amma haniana bic dekperagiec. Ye ngic sueu ngeneng ye mi negensingedae amma Manggacac ubaudumeng mi negemma yengena dafia mi henggec nga enacyoarango ubaherenginau mi fede. <sup>39</sup>Mitikibingo kekecseri meficgengemmeude, ngeni ifi negensinggema kibi imoc osonegeng angkecdae. Kibi imocngonoc neac hepuc amma neac hania dekperagiude. <sup>40</sup>Nga ngeni ine nearu hama kekec megecdeac mi angemmede.

<sup>41</sup>Ni ngic yeneac dedengerec mi hoanggebade, kpac. <sup>42</sup>Nga Anutuac songo imoc ngeneac ubahereu mi fede, imoc negenduaengoc. <sup>43</sup>Nga ni Mannaac kpacfu haba ngeni mi hoannugecde. Nga ngic mong yengena kpacfu haudeu ngeni ye bic hoanggegecde.

<sup>44</sup>Ngeni ngenaocngoc dengereemema Anutu mocgu yearunac dedengerec haande, imocac mi angemmeudeu ngeni ye negensinggegecdeac obohogece. <sup>45</sup>Neng kecma Manggacaru yoacfu faingunubade, ngeni ifi mi negembisia. Ngeni Mosearu heirima kegec yeng yoacfu faingunuude. <sup>46</sup>Mosengo neac negemma ohoec. Imocac amma ngeni imoc negensinggebau dede ni ifingoc negensinnubau. <sup>47</sup>Ngeni Moseac mitikibi mi negensinggedaeu neng yoac deduae, imoc ifingoc naric mi negensinggegecde.”

**6** <sup>1</sup>Yesungo yoac imoc dedacma Gariraia dzohongtoa, imocac kpara mong Tiberia dzohongtoa, imoc ferecgema edibigeng enec. <sup>2</sup>Nga yeng hafeigoc yenearu faka kuhagoc meu ngicngac yeneng imoc henggecac amma ngicngac habutoango ye modacgec. <sup>3</sup>Modacgec Yesungo medacfora yenigoc tikibumau emma tacgec. <sup>4</sup>Anu yudangic yeneac makekeng hombang naso wegeneec.

<sup>5</sup>Nga Yesungo kic fiu kenu ngicngac habutoango kuting kuting yearu kenggec, yenemma Firipo yofi kpesimiec, “Nenang yaka dahacnac bummema ngicngac habutoa yomoc yemmeni negecde?” <sup>6</sup>Yeng noc faka meude, imoc bic negemma Firipo eng tobanggema kpesimiec. <sup>7</sup>Kpesimiu

Firipongo meremmiec, “Nenang afo 8ac uabung, imocac socfu yaka bummema hesisicke yemmeni yeneacsoc mi anude.”<sup>b</sup>

<sup>8</sup>Ifi deu medacfora yeneac botucfunac Anderea, Simong Petoaroac muneango deec, <sup>9</sup>“Medacbisic mong yei nande, ye ic sogong 5 bari gbomeango memea<sup>c</sup> nga kondungyang yohockang mekecde, imocngo ine habutoa dafi yemmeni sokoyunuude?”

<sup>10</sup>Ifi deu Yesungo yofi deec, “Ngeni ngicngac matacgecdeac edeyunugec.” Ifi deu edeyunugec kpindzingtoa feec, imohai matacgec. Ngic tacgec, yeneac kpetengina 5 tauseng isoc anec. <sup>11</sup>Tackenggec Yesungo ic sogong imoc mema Anutu ubangerec edema mederema ngicngac ihai tacgec, yeni yemmeec. Yemmeu wisickeu kondungyang ifingoc mema medereu songonginaac areng menec anggec.

<sup>12</sup>Negec gebecyunuu Yesungo medacfora yofi edeyunuec, “Yaka tosea neti anggec fema manganebacac ngeni imoc kpedzucnedacgec sakacfu kemedaru.” <sup>13</sup>Ifi deu yeni ic sogong 5 bic negec, imocac tosea kpedzucnedacgec kemema sakac 12 wakeec.

<sup>14</sup>Wakeu ngicngac yeng faka kuhagoc meec, imoc hemma degec, “Foracngoc, ngic yocnoc profete bangecfu haudeac dedea.” <sup>15</sup>Nga ngic yeneng hama Yesu mendanggema ngictaungina faibesonga degec Yesungo negengyemmema meickema monggoc tembuha tikiu enec.

<sup>16</sup>Enu ama kundung kpemanu medacfora yeni dzohongtoa tegiau kemegec. <sup>17</sup>Kememagec ama kundung kpeu Yesungo yenearu mi hamanu yenaocngoc gombau emma dzohongtoa ferecgema Kafanaung kembesonga kenggec. <sup>18</sup>Kemmagec firangtoa kpeu dzohonggac tembong kuneng yarec. <sup>19</sup>Nga yeni 5 me 6 kiromita, imocacsoc puri kpema kemmagec Yesungo doku witiau titi kemma gomba mewegeneu yeni hemma kengec anggec. <sup>20</sup>Ifi anggec ine Yesungo yofi edeyunuec, “Imoc ni, neannaoc haduae, ngeni kengec mi anggec.” <sup>21</sup>Ifi deu negemma Yesu gombau taiembeso ammagec gombango bangec kembeso degec, imohai bic kensikeec.

<sup>22</sup>Wereckengau ngicngac habutoa yeneng dzohong noboc namma degec, “Gomba mocgungosac yoc taru hending. Nga Yesungo ine medacfora yenigoc imohai mi enu yeni tembucngina emma kendau.” <sup>23</sup>Ifi dema nammagec gomba goa Tiberia taonnunac kemma, Kebungo Anutu dangge dema ic sogong gumecyunuecfu, ama imoc mewegenema hagec. <sup>24</sup>Hama yeni Yesu nga medacfora ihai mi yenenggecac habutoango Yesu hofocbesonga Kafanaung taonnu kenggec.

<sup>25</sup>Hofocma dzohong edibigeng kemma meficgema kpesimigec, “Rabbi, ge noc nasoac yei hadang?” <sup>26</sup>Ifi degec Yesungo yofi edeyunuec, “Foracngoc, neng faka kuhagoc meba hendau, imocac amma mi

---

<sup>b</sup> 6:7 Ye denari 200 deec.   <sup>c</sup> 6:9 Bari flawa imoc wit flawa siriha ifia.

hofocnudae, imoc edengunuduae. Ngeni yaka negebec andauac hofocnudae. <sup>27</sup>Yaka mong hoama kpac angande, ngeni imocac uatoa mi mebisia. Nga Ngicac Medacngo kekecseriac yaka ngemmeude, imocac uatoa mebisia. Imoc yofiac, yeac witiu Anutu Manggacngo yengena dedeseriac dzic faiec.”

<sup>28</sup>Ifi deu yeni kpesimigec, “Anutuac ua mebeso dema noc ua meni ngereeudef?” <sup>29</sup>Ifi degec turunga yofi merengyemmeec, “Anutuac ua yomocnoc. Anutungo ngic sueu haec, ngeni ye negensinggegec.”

<sup>30</sup>Ifi deu yeneng degec, “Hemma negensinggunideac noc faka kuhagoc menade nga ge noc ua naric menade? <sup>31</sup>Kisicfocnina bangec kisiu mannayaka<sup>d</sup> nekecgec, imocacnoc yofi oho ohoya fede, ‘Ye kurumennunac yaka yemmu negec.’”

*(Makekeng 16:4; Nehemia 9:15; Mitiyegec 78:24)*

<sup>32</sup>Ifi degec yofi edeyunuec, “Foracngoc, Mose ye yengenaoc kurumenggac yaka mi mema ngemmeec, imoc edengunuduae. Mannango kurumenggac yaka fora ngemmeude. <sup>33</sup>Anutuac yaka, ngic yennoc kurumennunac mama bangecngic yeneac kekec meficgeyemmeude.”

<sup>34</sup>Yeng ifi deu degec, “Kebu, ge yaka imoc nasosoc nemmekecbesena.”

<sup>35</sup>Ifi degec Yesungo yofi edeyunuec, “Ni neannaoc yaka kekehagoc, imocac ngic mong ye nearu haude, yeng yakaac mi homeude nga mong ye ni negensinnuude, yeng dokuac monggoc mi ammiude. <sup>36</sup>Neng ine yofi bic edengunuai, ngeni bic nenggec nga sifu mi negensinnuandae.

<sup>37</sup>Mannango ngicngac sasawa nenec, yeneng nearu hagec ngadeau naric mi kisangyunubade. <sup>38</sup>Ni neanna ubanaac kurumennunac mi mayai. Suenuec, yeac negen negeng modacbadeac mayai. <sup>39</sup>Nga suenuec, yeac songo nga negen negeng yofi, ye yengenaoc ngicngac nenec, yeni marina titingaunac mi mabisia nga yeni kecma naso wisic wisickeau midiyunuba yacdacecde. <sup>40</sup>Mannaac negen negeng imoc yofi, ngicngac Medaha hemma negensinggegecde, yeni sasawango kekecseri megecde. Nga naso wisic wisickeau neng midiyunubesanduae.”

<sup>41-42</sup>Nga yeng yofi deec, “Ni neannaoc yaka fora amma kurumennunac mayai.” Imocac amma yudangic yeneng negenggec naric mi anu degec, “Ngic yomoc Yesu, i. Ye Yosefeac medac nga neni nonggomama negengyurudimbe. Ammanu yeng dafi yofi dede, ‘Ni kurumennunac mayai.’” <sup>43</sup>ifi degec Yesungo yofi deec, “Ngeni negemmangang wagec. <sup>44</sup>Mannango ngic mong mi heitaiudeu yeng nearu naric mi haude. Manggac suenuec, yeng ngicngac heitaiyunuec nga neng naso wisic wisickeau midiyunubesanduae.

<sup>45</sup>Profete yeneac kibiyoac yofi oho ohoya fede,

---

<sup>d</sup> 6:31 Anutungo bangec kisiu yaka mong meficgeyemmu asoacsoc sobing isoc kpedzucnekecgec, imoc kpara mannayaka

‘Anutungo kpouyemmedarec.’

(*Yesaia 54:13*)

Imocac amma ngicngac sasawa Manggacac yoacfu kedzac faima yearunac negen negeng medae, yeneng nearu hadacgecde. <sup>46</sup>Ngic mongngo Manggacac mi henec, kpac. Ngic mocgungo Manggacgoc kefec, yeng Manggacac henec. <sup>47</sup>Foracngoc, ngic mongngo ye negensinggede, yeng kekecserigoc anude.

<sup>48</sup>Ni neannaoc kekecac yaka. <sup>49</sup>Kisicfocnina yeneng bangec kisiu mannayaka<sup>e</sup> nema homedacgec. <sup>50</sup>Ngeni yaka kurumennunac maec, yocnoc nema mi homegecde. <sup>51</sup>Ni neannaoc yaka kekehagoc amma kurumennunac mayai. Ngic mong ye yaka imoc neudeu ye kekecseri meficgema kechereema kefude. Yaka imoc fusina. Ngicngoc kekec meficgegecdeac yemmebade.”

<sup>52</sup>Ifi deu yudangic yoacngina manganau degec, “Ngic yomoc ye dafi sebifusia nemmeu nenideac dede?” <sup>53</sup>Ifi degec Yesungo yofi edeyunuec, “Foracngoc, ngeni Ngicac Medac sacfusina mi negecdeu kekecngoc ngenearu mi feude, imoc edengunuduae. <sup>54-55</sup>Imoc yofiac, neac fusi, imocngoc yaka fora nga neac sac, imocngoc doku fora, imocac amma ngic mong ye sacfusina neude, yeng kekecserigoc anu neng naso wisic wisickeau ye megboribade. <sup>56</sup>Anu mong ye neac sac nga fusi neude, yeng neac heremanau kefu neng yeac heremanau kecbade. <sup>57</sup>Manggacac suenuec, ye kekec mingina nga ni yeac amma kecduae. Nga mong ye fusina neude, ye ifi isocngoc neac amma kefude. <sup>58</sup>Yaka yomocngoc kurumennunac maec kecde, imoc bangecfocninango yaka nema homegec, ifi isoc kpac. Mongngo yaka yomoc neude, yeng kecma kekecseri meude.” <sup>59</sup>Yesungo yoac imoc Kafanaung kpekpeturang amau ngicngac edekpou ayemmeec.

<sup>60</sup>Ifi deu negemma medacfora yenearunac homacngoc degec, “Kpoukpou imoc ebihagoc, mongngo imoc negemma naric mi modarude.” <sup>61</sup>Ifi degec Yesungo edekpou ayemmeu medac yeni yoac homac osogecac yengenaoc negengyemmema yofi edeyunuec, “Yoac imocngoc memanganengunude me? <sup>62</sup>Nga Ngicac Medac ye warac kefecfu dzigene enu ngeni imoc hemma dafi anggecde? <sup>63</sup>Asungo kekec meefaiude nga sebiac kekec, imocngoc memefiha kpac. Ni yoac edengunudua, imoc Asu nga kekec. <sup>64</sup>Anu ngeniac botucfunac goango ine yoacna mi negensinggedae.” Imoc yofiac, ngicngac damoc yeneng ye mi negensinggegec nga ngic merang Yesu doc mema ngaba yeneac mariu faiude, Yesungo imoc bic negenec. <sup>65</sup>Ifi anu yofi torokpeec, “Ngic goa ngeneng mi negensinggedae, imocac amma waraima bic edengunudua, Manggacngoc ngic mong mi meefaiudeu, yeng nearu naric mi haude.”

<sup>66</sup>Ifi deu medac homacngoc Yesu wama amanginau kemma yegoc monggoc mi yerecgegec. <sup>67</sup>Kenggec Yesungo medacfora 12 yofi

---

<sup>e</sup> 6:49 Anutungo bangec kisiu yaka yemmekefec, imoc asoacsoc sobing isoc bangecfu fingeckefu ngicngac yeneng imoc kpedzucnema nekecgec, imoc kpara mannayaka.

kpesiyemmeec, “Ngeni ifingoc wanuma kembeso angemmede me?”  
 68 Ifi deu Simong Petorongu yofi meremmiec, “Kebu, gearu kekecseriac  
 yoac fora fedea neni ngic monggaru naric mi kennide. 69 Neni bic  
 negentegecma negensinggudimbe, genoc Anutuac Kpetiacngic.”

70 Ifi deu Yesungo yofi deec, “Neng medac 12 meisingngunuai nga  
 ngenearunac ine mongngo hadehade ande.” 71 Ye yoac imoc Simong,  
 Karioto taonnunac yeac medaha Yudaac negemma deec. Ngic imocngo  
 medac 12 yenearunac amma yeng Yesu doc meudeac anec.

**7** 1 Imocac ngadeau yudangic Yudaia bangecfu kecgec, yeni Yesu  
 kpehomebesonga sing hofocgec. Imocac amma yeng ihai mi kengha  
 amma Garirai bangecfu yerecema kefec. 2 Anu yudangic yeneac bedzo  
 40ac hombang wegene haec.<sup>f</sup> 3 Nga Yesu munafora yeneng edegec, “Ge  
 bangec yomoc wama Yudaia bangecfu kemma fakaga imoc ihai mena  
 medacfocga henggecde. 4 Mong ye habu yeneac kicfu fingecceso negende,  
 ye sufu sufuu ua mi mebeso. Ge fakaga imoc annadeu ngicngac yeneng  
 fakaga hentegecgecdeac didiu kecma mebesena.” 5 Nga munafora yeneng  
 ifingoc ye mi negensinggec.

6 Ifi angec Yesungo yofi edeyunuec, “Neac naso mi hadac nga  
 ngeneac naso, imoc ine nasosoc feude. 7 Ngicngac yeni ubango naric  
 mi ukungunugecde. Nga neng ine angammemengina mangana  
 dekperagianduaeac ubango ukunugec. 8 Ngeni hombannu kenggec nga  
 ni ine bic mi kembade nocac neac nasoyombong mi ande.” 9 Ye ifi dema  
 wama Garirai bangecfu tarec.

10 Taru munafora hombangac kemmagec ye ifingoc kemma  
 fingecegecma mi keng keng sufu sufuu kenec. 11 Ifi anu yudangic yeneng  
 hombannu Yesu hofocma kpesiemegec, “Ngic imoc dahai?”

12 Kpesiemegec ngicngac habutoango yeac sangic kpema homac  
 denegeng amma degec, “Ye ngic gombunga.” ifi demagec goa yeneng  
 degec, “Kpac, ngic imocngo ngicngac habutoa ikoc ayemmeande.”

13 Amma yudangic yeneac kengecyunuu mongngo Yesuac yoac didiu mi  
 deec.

14 Anu hombang imoc bic dzonginemanu Yesungo womonnu emma  
 ngicngac edekpou ayemmeec. 15 Kpouyemmeu negemma yudangic  
 yeneng kerectegec amma degec, “Ngic imoc ye dafi, ye negen negeng  
 mong mi mema sifu mitikibiu yoac oho ohoya fede, imoc negende.” 16 Ifi  
 degec Yesungo yofi merengyemmeec, “Ni yoac kpoungemmeduae, imoc  
 neanna yoac kpac. Imoc suenuec, yeac yoac. 17 Ni yoac kpoungemmeduae,  
 imoc Anutuarunac me neanna ubanaac deduae, imoc ngic mongngo  
 Anutuac enac tofohobeso negende, yeng negentegerude. 18 Ngic mong ye

---

<sup>f</sup> 7:2 Hombang imoc Anutungo bangec kisiu kifa 40 garengyunuu bedzonginai kecgec,  
 yeni imoc negensima hombangac tacandae.

ubeaac yoaac deande, ye yengena dedengerec fingerudeac negensima imoc deude. Nga mong ye ngic sueec, yeac dedengerec fingerudeac ua meande, yeng ngic fora, yearu faka dindingac fede. Faka sege-segea yearu mong mi fede.

<sup>19</sup>Mosengo dedeseriyoac ngenmeec, fora. Nga ngene-runac ngic mongngo imoc ine mi modackecde, kpac. Amma ngeni nocac nuhomebeso negendae?”

<sup>20</sup>Ifi deu habutoa yeneng merenggec, “Ge yafinggagoc. Merang gubeso dede?” <sup>21</sup>Ifi degec Yesungo yofi edeyunuec, “Ni faka kuhagoc meba ngeni henggecac sasawango kerec-tegec andae. <sup>22</sup>Nengenggec, Mosengo ngeni sebi tosangina, imoc herecgegecdeac uayoac ngenmeec. Mose ye yengenaoc imoc mi hanahemanu yeac bangecfora yeneng ine hanahegec. Imocac amma ngeni faka imoc modacma sabata nasungoc ua imoc megecde. <sup>23</sup>Amma ngeni Moseac dedeseriyoac mi ferahegecdeac sabata nasungoc ngic yeneac sebi tosangina herecgeandae. Ngeni faka ifia mekecdaeu neng sabata nasou ngic mong sebia hafoangoc mengerebare nocac ngaba anendae? <sup>24</sup>Ngeni kicnginango sebiu heheng imohai mi isinggema debisia. Ngeni ine yoaac dindingac negengising amma debisia.”

<sup>25</sup>Ifi deu Yerusalem taonggac ngic goango kpesiemegec, “Ngc imoc kpehomebeso dedae me? <sup>26</sup>Nga ngic ye yoaac didiu demanu nocac turunga mong mi merendae? Yeni ye Messia, imoc bic ireckedae gedang. <sup>27</sup>Nga Messia haudeu ye dahacnac haude imoc ngic mongngo mi negenude nga ngic yoc ye dahacnac, imoc ine negendacdimbe.”

<sup>28</sup>Ifi degec Yesungo imoc negemma womong manau namma yoaac kucgoc dema yofi edekpou ayemmeec, “Ngeni ni negennuma dahacnac hayai, imoc negendaengoc. Ni neanna negen negennu wiac mong mebesonga mi hayai. Suenuec, yeng fora anu ngeneng ye mi negendae. <sup>29</sup>Nga suenuec, ye negemmiduae, nocac yearunacnoc hayai.”

<sup>30</sup>Ifi deu yeni mendanggema witicamau faibesonga nengenggec. Nga nasoya mi haecac mongngo mi kpeserema megec. <sup>31</sup>Nga habutoa yene-runac ngicngac homacngo ye negensinggema degec, “Messiangoc haude, imohai yeng faka kuhagoc meude, imoc ngic yocngo faka kuhagoc homacngoc meande, imoc mi ferahema meude.”

<sup>32</sup>Habutoa yeneng ifi dema sangicfu yoaac denengeng anggec. Anggec farisaio yeneng imoc negemma womong gareng enarafocngina yenigoc kpedzucnema keracnatang sueyunugec Yesu mendanggema witicamau faigecdeac kenggec. <sup>33</sup>Ifi anggec Yesungo yofi deec, “Ni naso wegenanec-sac ngenigoc kecbade. Kecma suenuec, yearu monggoc dzigenema embade. <sup>34</sup>Ngeni ni hofocnubibiema naric mi meficnugecde nga ni kembade, imohai ngeni naric mi hagecde.”

<sup>35</sup>Ifi deu yudangic yenaocngoc denengeng amma degec, “Ngc yomoc ye dahai kenu hofocma mi hennideac dede. Ye arengfocnina grik bangec-fu



sinsararang kpema kecdae, ihai gedang kemma griknigcngac yoac edekpou ayemmeude. <sup>36</sup>Ngeni ni hofocnubibiema naric mi meficnugecede nga ni kembade, imohai ngeni naric mi hagecede. Yoac imocac hania mi negentegecdimbe.”

<sup>37</sup>Hombang wisic wisicke, imocac nasoyadau Yesungo mama yoac kucgoc yofi deec, “Ngc mong ye dokuac homeandeu ye nearu naric hama nebeso. <sup>38</sup>Nga mongngo ni negensinnude, yeacnoc mitikibiu yofi oho ohoya fede, ‘Yeac hereunac kekecac dokukiwa tohoma kenude.’” <sup>39</sup>Ngcngac ye negensinggema kecdae, yeneng Tiri Asu ngade megecede, imocac ifi deec. Yesungo naso imohai kurumennu emma kuc nga kibikperagiagoc mi anecac amma Asu imoc mi yemmeyemnea.

<sup>40</sup>Anu ngicngac habutoa yeneng yoara imoc negemma goango degec, “Ngc yomocngo profetenina fora yombong.” <sup>41</sup>Amma goa yeneng degec, “Ngc imoc ye Messia.” nga goa yeneng degec, “Kpahac, Messiango Gariraia bangecfunac mi haude.” <sup>42</sup>Mitikibiu yoac yofi oho ohoya fede, “Ye Dawidiac dzominga Beterehennunac, imoc Dawidiac ama yombong.” <sup>43</sup>ngic yeni ifi dema Yesuac amma tohoemmegec. <sup>44</sup>Tohoma goango ye mendanggema witicamau faibesonga, ifi degec amma mongngo ine sebiau mi kpesereec.

<sup>45</sup>Keracnatang yeni womong gareng enara nga farisaio yenearu eng dzigenema kenggecac kpesiyemmegec, “Ngeni nocac Yesu mi mehadae?” <sup>46</sup>Kpesiyemmegec degec, “Ngc mongngo yoac ifia deu mi negenning.” <sup>47</sup>Ifi degec farisaio yeneng merengyemmegec, “Ngeni ifingoc yeac ikocfu makpedau me? <sup>48</sup>Enarameme nga farisaio neneac botucfunac mongngo ye naric mi negensinggedimbe, kpac yombong. <sup>49</sup>Nga sicsauc areng yomocngo dedeseriyoac mi negentegecdae, ngeni sowec medae.”

<sup>50-51</sup>Ifi degec, yenearunac mong kpara Nikodemo, ye warac Yesuaru kenec, yeng yofi deec, “Dedeseriyoacninango yofi dede, ‘Ngc monggac yoara nga angammemea mi hennegeng amma isinggema tactacngoc yoacfu mi faibesonga.’” <sup>52</sup>Ifi deu turunga yofi meremmigec, “Ge ifingoc Gariraia bangecfunac me? Mitikibiu hennegeng amma yofi bic hennade, profete mongngo Gariraia bangecfunac mi fingerude.” <sup>53</sup>Ifi dema yacma amanginasoc kendacgec.

**8** <sup>1-2</sup>Yesungo oriwa tikiu emma taru ama wereckembeso ammanu mama monggoc Anutuac womonnu enec. Enu ngicngac yearu hadacgec tacma miti kpouyemmeec. <sup>3</sup>Ifi amma tacmanu mitiac negen negengngic nga farisaio yeneng ngac mong sero anu hemma Yesuaru mehama kicnginau faigec nanec.

<sup>4</sup>Nanu Yesu kpesimigec, “Kpoukpou, ngac yomocngo sero kicin nau anu hending. <sup>5</sup>Nga dedeseriyoacfu Mosengo ngac ifianoc hocngo yenerehomenideac deserinemmeec. Geng yaguc dafi denec?” <sup>6</sup>Yeni Yesungo yoac mong dafi deu negemma yoacfu faini dema faitobang ammigec.

Ifi ammigece Yesungo ngonducnema gbongango bangecfu kibi ohoec. <sup>7</sup>Ohoma nammanu kpesima kpesi anggece kprehengaima yofi edeyunuec, “Ngenearunac ngic mong kopocsiha kpac kecede, yeng waraima hoc ukuu ukubisia.” <sup>8</sup>Ifi dema monggoc ngonducnema bangecfu kibi ohoec. <sup>9</sup>Anu yeni Yesuac yoac imoc negemma kifanginaac sirihau yadango waraima Yesu wama kendagece ngac ye botucnginau tembuha nanec.

<sup>10</sup>Ifi nanu Yesungo kprehengai hemma yofi kpesimiec, “Ngac, ngic yeni dahai kendau? Ge manganaac areng, imoc mong dedau me?”

<sup>11</sup>Kpesimiu deec, “Kebuna, kpac.” Ifi deu Yesungo yofi edeec, “Neng ifingoc ge mangana areng mi debade. Ge kemma kopocsi monggoc mi meficgebesena.”

<sup>12</sup>Yesungo monggoc torokpema yoac yofi edeyunuec, “Ni bangectoa bangec imocac ngicngac ngenec kperagi. Mong ye ni modacnude, yeng kundunggac sing mong mi modarude. Amma ye kekecac kperagi kefude.” <sup>13</sup>Ifi deu farisaio yeneng merenggece, “Ge geanggaocngoc dekperagiemenec, imoc singngo mi dedeac yoacga fora mi ande.”

<sup>14</sup>Yesungo meremma yofi edeyunuec, “Ni neannaocngoc haniana dekperagiemeduae, imoc fora. Ni dahacnac hayai nga dahai kembade, imoc neannaoc negenduae. Ngeni ine dahacnac hayai nga dahai kembade, imoc mi negendae. <sup>15</sup>Ngeni bangecngic siricnginau ngicngac fakangina isinggema haniangina deandae. Neng ngic mong isinggema hania dede ua mi mebade. <sup>16</sup>Ni tembucna ua imoc mi mekecduae. Manggac suenuec, yegoc ua mekecdipe. Imocac neng desi desiu meduaeu imocngo foragoc ande. <sup>17</sup>Dedeseriyoacnginau yoac yofi oho ohoya fede, ‘Ngic yohockang dedengira mocgu anu yoacngira fora anude.’ <sup>18</sup>Imocac amma neannaocngoc dekperagiemeba Manna suenuec, yeng ifingoc hepucna amma dekperaginuude.”

<sup>19</sup>Ifi deu farisaio yeneng kpesimigec, “Geac Mangga dahai kecede?” degece Yesungo meremma yofi edeyunuec, “Ngeni ni mi negennudae nga Manna ifingoc mi negemmidae. Ngeni ni negennubau debac Manna ifingoc negemmibau.” <sup>20</sup>Yocac imoc, womonggac mana monnu soikia katapa tarecfu, imohai ngic edekpou ayemmeec. Nga ngic mongngo mendanggema witicamau mi faigec nocac ye ifi ammigece deac naso mi anec.

<sup>21</sup>Amma Yesungo monggoc yofi edeyunuec, “Ni kemma ngeni hofocnuma kopocsiingagoc kecima homegecede. Nga ni kembade, imohai ngeneng naric mi hagecede.” <sup>22</sup>Ifi deu yudangic yeneng degece, “Ni kembade, imohai ngeni naric mi hagecede. Ye nocac ifi dede? Yengena sebua eweude me?” <sup>23</sup>Ifi degece yofi edeyunuec, “Ngeneng emu bangecfunac nga ni bangecfunac kpac, ni wihacnac. <sup>24</sup>Imocacnoc edengunuducae, ngeni kopocsiingagoc kecima homegecede. Ngeni ‘ni kecduaengoc’, imoc mi negensinggedae kopocsiingina fekefu homegecede.”

<sup>25</sup>Ifi deu kpesimigec, “Anu ge merac?” degec yeng yofi edeyunuec, “Ni haniana bic edengunudua. <sup>26</sup>Ni ngeneac haifakangina homac hennegeng amma isinggema desibadeac fede. Anu suenuec, ye yoac foraac mingina nga wiac yearunac negenduae, imoc bangecfu dekperagibade.”

<sup>27</sup>Yesungo Mamaac negemma edeyunuu yeni obohogec. <sup>28</sup>Obohogec Yesungo yofi edeyunuec, “Ngeni Ngicac Medac nanggegec nanude, ngeni naso imohai ‘ni kecduaengoc’, imoc negentegecgecde. Ni wiac mong neannaoc mi angkecduae, Mannango kpounenec, imoc debade. <sup>29</sup>Suenuec, yeng nigoc kecde. Ni yeac songo modacma ua mekecduae. Imocac amma ye wanuu tembucna mi kecbade.” <sup>30</sup>Yesungo yoac ifi deu ngicngac homacngo ye negensinggec.

<sup>31</sup>Yesungo yudangic ye negensinggec, yeni yofi edeyunuec, “Ngeni neac yoac hoanggema kecgecdeu neac medacfocna fora anggecde. <sup>32</sup>Ifi amma yoac fora negentegecgecde nga yoac forango witicfunac yungecngunuude.” <sup>33</sup>Ifi deu meremmigec, “Neni Abrahanggac kiscifunac, mongngo wanac mi menunuec. Nga merang wanac menunuecac geng yungecnununadeac denec?”

<sup>34</sup>Ifi degec Yesungo yofi deec, “Ni fora yombong edengunuba, mongngo kopocsic meande, ye kopocsicngo wanac meu wanacngiha kecde. <sup>35</sup>Wanac meu kecande, ye ama imocac manau hombonanga naric mi kefude. Nga Medacngo ama imocac manau hombonanga kefude. <sup>36</sup>Imocac Medacngo yungecngunuudeu ngeni witicngina kpac kecgecde. <sup>37</sup>Ngeni Abrahanggac kiscifora, imoc negenduae. Neac yoacac titinga mong ine ngeneac ubahereu mi nandae nuhomebeso efaidae. <sup>38</sup>Ni Mannaac hoannu kecma wiac hennegeng anai, imocnoc edengunuduae. Nga ngeni ine mangnginaarunac wiac nga faka negengandae, imocnoc amma kecdae.”

<sup>39</sup>Ifi deu degec, “Neneac mannina Abrahang.” degec Yesungo yofi merengyemmeec, “Ngeni Abrahanggac nambaracfora ambau debac yeac kekec nga faka modacbau. <sup>40</sup>Ni ngic mongngo Anutuarunac yoac fora negemma edengunubare ngeni nocac nuhomebeso andae? Abrahang ye faka ifia mong mi angkefec. <sup>41</sup>Ngeni ine mangnginaac kekec nga faka modacandae.” Ifi deu yeneng degec, “Neni sicsaucfunac mong mi fingering, kpac yombong. Mannina mocgu Anutu.”

<sup>42</sup>Ifi degec Yesungo yofi deec, “Ni Anutuarunac fingeema neanna ubanaac mi mayai. Yennoc suenuec, imocac ngeni Anutu mangngina ambac dede heregoc neac songo negemma hoannubau. <sup>43</sup>Nga ngeni ine yoacnaac kedzac kpegecdeacsoc mi ande, imocac amma ngeni yoac deanduae, imoc mi negentegecdae.

<sup>44</sup>Nga mangana mingina, yennoc ngeneac mangngina nga faka yeac songou fede, ngeni imoc megecdeac angemmeude. Ye hanahemangoc ngic yunuhomeande nocac yeac ubahereau faka fora mi feu faka fora mi

mema nangkecde. Ye ikocngic nga ye ikocac mama kecdenoc. Imocac amma ye yoac ikoc dema yengenaoc nanggeeme kefude. <sup>45</sup>Nga ni yoac fora deduaeac ngeni neac yoacna mi negensinggecede. <sup>46</sup>Ngenearunac mongngo neac kopocsic mong negendaue naric mi heficgebac. Nga ni yoac fora deduae isoc ngeni nocac mi negensinnudae? <sup>47</sup>Anutuac arengfora yenennoc yoara negenggede. Ngeni ine Anutuac arengfora kpac, imocac yeac yoac mi negenggede.”

<sup>48</sup>Anu yudangic yeneng meremmigec, “Ge samariangicnoc amma ge hadehadegagoc, ifi deandimbe nga imoc yoac fora.” <sup>49</sup>Ifi degec Yesungo meremma yofi edeyunuec, “Ni hadehadena kpac. Ni Manna ewehaihei ammiba ngeneng ine ewehaihei mong mi anengandae. <sup>50</sup>Ni neanna kpac kuneng mebadeac ua mi meanduae nga mongngo neac kpac miacma desiude. <sup>51</sup>Foracngoc, ngic mong ye neac yoac mekefudeu, ye naric mi homebesande, ni edengunudae.”

<sup>52</sup>Ifi deu yudangic yeneng degec, “Ge hadehadegagoc, neni yaguc negenggudimbe. Abrahang ye homeec nga profete yeni ifingoc homegec. Geng ine denec, ‘Mong ye neac yoac mekefude, yeng mi homebesande.’ <sup>53</sup>Anu ge kisicnina Abrahanggac engena mi annec. Ye homeec nga profete yeni ifingoc homegec. Amma ge geanggaac negenna engena ande, imocngo naric mi ande.”

<sup>54</sup>Ifi degec Yesungo yofi edeyunuec, “Ni neannaoc dengereemebadeu imocngo fora mi ambac. Nga Manna ngeneac Anutungina kecde, yeac ifi deandae, yeng ewehaihei anende. <sup>55</sup>Ngeneng mi negemmidae, neannaoc ine ye negemmiduae. Neng ye mi negemmiduae debadeu, ngic ikoha amma ngeni isoc ambade. Ni negemmiduaengo yoara mekecduae. <sup>56</sup>Bangecngina Abrahang ye neac naso fingeru imoc hembeso negemma songotoa femiec. Femi hemma songo negene.”

<sup>57</sup>Ifi deu yudangic yeneng degec, “Ge kifaga 50 mi andacngoc nga ge Abrahang hennec, imoc naric mi heide.” <sup>58</sup>Ifi degec Yesungo yofi deec, “Foracngoc, Abrahang mi fingeccmanu ‘ni kecduaengoc’, imoc edengunudae.” <sup>59</sup>Ifi deu yeni hoc mema heibeso anggec yeng sufufu sufuu womong ngadeau kemeec.

**9** <sup>1</sup>Yesungo sinnu kemma ngic mong kicpisc fingecc fingera henec. <sup>2</sup>Henu medacfora yeneng kpesimigec, “Rabbi, ngic yoc meracac kopocsicac amma kicpisc fingerec? Yengenaac me nonggomama yereac kopocsicac?”

<sup>3</sup>Ifi degec Yesungo yofi edeyunuec, “Ngic yengena me nonggomama yeneng kopocsic meficgegec, imocac kpac. Anutuac ua mong yearu fingeccgeru henggecdeac ifia fingerec. <sup>4</sup>Suenuec, nenang yeac ua wenacfungoc mekeccbisina. Nga ama toforemanu mongngo ua naric mi meude. <sup>5</sup>Ni bangecfu kecma bangecac kperagi anduae.”

<sup>6</sup>Ifi dema bangecfu sofohoma imoc bangecgoc yerecgeu goteng fingeru ngic kicpisc yeac kiwau hosoec. <sup>7</sup>Hosoma yofi edeec, “Ge Siroang

dzohonnu kemma doku nadzicna.” (Siroanggac titiha imoc “Sueec.”) Ifi deu kemma nadzicma kicfifi amma dzigeneec.

<sup>8</sup>Ifi amma dzigene hau amafora nga ngicngac goa warac iwaiac dereckekefu henggec, yeneng degec, “Ngc yomocngo tacma dereckekefec me?” <sup>9</sup>Goango degec, “Imoc yennoc.” Nga tosea yeneng ine degec, “Imoc ye kpac, imoc ye isoc mong.” nga yengenaoc deec, “Ni ngic yomocnoc.” <sup>10</sup>Ifi deu kpesimigec, “Ge dafi amma kicga fidang?” <sup>11</sup>Ifi degec deec, “Ngc kpara Yesu, yeng goteng yerecgema kicnau hosoma suenuma deec, ‘Ge kemma Siroannu doku nadzicna.’ ifi deu kemma nadzicma kicfifi andua.” <sup>12</sup>Ifi deu kpesimigec, “Nga ngic imoc damoc?” degec deec, “Ni mi negenduae.”

<sup>13</sup>Ifi deu yeni ngic warac kicpisis kefec, imoc farisaio yenearu hesicke kenggec. <sup>14</sup>Nga Yesungo goteng yerecgema ngic kiwa merecgeu kicfifi anec, imoc sabata nasou ifi anec. <sup>15</sup>Nga farisaio yeneng ifingoc ngic hemma kpesimigec, “Ge dafi amma kicfifi andang?” degec deec, “Ye gotengngo kicnau hosou imoc nadzicma kicfifi andua.”

<sup>16</sup>Ifi deu farisaio goango degec, “Ngc imoc ye sabata tatacnaac sing mi modacde, imocac ye Anutuarunac kpac.” Ifi degec goango degec, “Ngc kopocsihagocngo dafi faka kuhagoc ifia mebac?” Ifi dema yenaocngoc tohogec. <sup>17</sup>Tohoma kicpiscngo kicfifi anec, ye monggoc kpesimigec, “Ge ngic kicga merecgeec, yeac dafi denec?” degec deec, “Ye profete mong.”

<sup>18</sup>Ifi deu yudangic yeneng ngic imoc kicpisis kefecfunac ngereema kicfifi anec, imoc mi negensingegecac nonggomama kpacyuruma <sup>19</sup>kpesiyecmegec, “Ngc yomoc ye ngereac medac me? Ye kicpisis fingerec, ifi dedape me? Nga ye dafiu yaguc kicfifi ande?” <sup>20</sup>Ifi degec nonggomama yereng yofi merennoc, “Ngc yomoc nereac medac. Ye kicpisis fingerec, imoc negendipe. <sup>21</sup>Nga dafiu yaguc kicfifi ande nga merang kiwa merecgedac, imoc neri mi negendipe. Ye bic yadi yadiaac amma yengena kpesimigec, yengenaoc haniaya edengunubeso.” <sup>22</sup>Yeri yudangic yeneac kengecyuruu ifi deoc. Yudangic yeneng yoac mong bic yofi dedzege anggec, “Mongngo Yesu ye Messianoc ifi dema deficgeudeu neni ye kpebung yeneac ngadeau faini kefude.” <sup>23</sup>Imocac amma nonggomama yereng deoc, “Ye bic yadi yadiaac yengena kpesimigec.”

<sup>24</sup>Ifi deec yeni monggoc ngic kicpisis kefecmoc, ye naso yohockang kpacma edegec, “Ge Anutu afehena. Ngic dedang, ye kopocsihagoc, imoc negemmidimbe.” <sup>25</sup>Ifi degec, yeng merengyemmeec, “Ngc imoc kopocsiememe me kpac, imoc mi negenduae. Nga wiac mocgu negenduae, ni warac kicpisis kefaingo yaguc kicfifi anduae.” <sup>26</sup>Ifi deu kpesimigec, “Ye noc wiac anggendac? Ye siriha dafiu kicga merecgedac?”

<sup>27</sup>Ifi degec yeng merengyemmeec, “Ni imoc bic edengunudacdua nga ngeni ine nearu kedzac mi faidau. Ngeni nocac monggoc negembeso

andae? Ngeni ifingoc yeac medacfora ambeso negensidae me?" 28 Ifi deu yeni desusuic ammigec, "Genoc ngic imocac medac nga neni Moseac medacforango kecdimbe. 29 Anutungo Mose edeu yoara deec, imoc negendimbe. Nga ngic yomoc ye dahacnac, imoc ine mi negemmidimbe."

30 Ifi degec yofi merengyemmeer, "Ngic imoc kicna meregedac. Nga ye dahacnac haec, imoc ngeni mi negendae. Ni imocac warecngunuduae. 31 Nenang yofi negendimbe, Anutungo kopocsicmeme yeneac yoac naric mi negengyemmeude. Anu ngic mongngo eweheimima dedea tofohoande, Anutungo ye negemmiude. 32 Bicngoc yombong hanahema feerekefecfu siduc mong yofia mi negenning, 'Ngic mong kicpisis fingeema kecmanu ngic mongngo kiwa meregeec.' 33 Ngic imoc Anutuarunac mi mabac dede, ye ua mong ifia naric mi mebac." 34 Ifi deu yofi meremmigec, "Ge hafaogoc manganaunac fingececnego yoac kpounemmenec, i." Ifi dema kucgoc kisanggec maec.

35 Anu Yesungo ngic kisanggec maec, imoc negemma hofockemma meficgema edeac, "Ge ngicac medac negensinggenec me?" 36 Ifi deu ngic imocngo deec, "Kunenna, ye merak? Edzacnuna hemma negensinggeba." 37 Ifi deu Yesungo yofi edeac, "Ge bic hendang. Ngic imocngonoc gegoc yoac yoac ande." 38 Ifi deu deec, "Kebu, ni negensingguduae." Ifi dema ye afeheec.

39 Nga Yesungo yofi deec, "Ni fakanginaac ising ising fingerudeac bangecfu mayaiac ngic kicpisisngo kicfifi anggecde nga kicfifi yeni kicpisis anggecde." 40 Yoac ifi deu farisaio goa yegoc nanggec, yeneng imoc negemma degec, "Neni ifingoc kicpisis me?" 41 Ifi degec Yesungo yofi deec, "Ngeni kicpisis kecbau debac kopocsic mi fengemmebac amma ngeneng ine yaguc dedae, 'Neni kicfifi kecdimbe.' imocac amma kopocsicngina fengemmekefude."

**10** 1 Ni fora yombong edengunuduae, "Ngic mongngo rama yeneac oda manau embeso dema oda naguya wama monnusing enudemoc, ye hamangec nga godzungic. 2 Ngic naguusing engande, yeng rama yeneac gareng. 3 Nga nagugarengngo yeac amma odanaguya naric witiude. Witiu rama yeneng ubea negenggec, yengenaoc rama kpacnginau kparu hagec waraiyemmu yenahafoc ngadeau kemegecde.

4 Ye ramafora hesicyunuu kemedacgec waraiyemmu ramafora yeni yeac ubea negendaeac ye modacgecde. 5 Amma yeni ngic furia naric mi modacgecde. Yeneng yeac ubea mi negendaeac kengec amma woragecde." 6 Yesungo yoac yomoc heima deu yeneng ine imocac obohogec.

7 Obohogec Yesungo monggoc yofi edeyunuec, "Foracngoc, neng rama yeneac nagu, imoc edengunuduae. 8 Ngic goa ni mi fingebare hagec, yeneng hamangec nga godzungic. Nga rama yeneng ine yenearu kedzac mi faigec. 9 Ni neannaoc nagu. Mongngo nearu ferecgema oda manau enudeu Anutungo ye ebicfunac mesiu komoc kpeude. Amma ye

naguusing engemmama amma nenesemeng meficgeude. <sup>10</sup>Hamangecngic yeng wiac hamangec meudeac nga yunuhomema kpetotieyunuudeac haude. Nga neng kekec monggoc nga monggoc mekecgecdeac hayai.

<sup>11</sup>Neannaoc ramagareng gombunga. Gareng gombungango rama yeneac amma kekeha waude. <sup>12</sup>Nga ngic mong ye yagura kemma ngic monggac ramagareng kecede, yeng rama yeneac mingingngina mi amma kecmanu katekasi hau ine hengkpatema woraude. Woraus katekasingo rama yininegirik ayemmeude. <sup>13</sup>Ngic imoc ye yaguraua mekecdeac rama yeneac negengyohoc mi anude. <sup>14-15</sup>Neannaoc ramagareng gombunga. Mannango ni negennude nga neng Manna negenduae, ifi isoc neannaoc ramafocna negengyunuduae nga ramafocna yeneng negennudae. Neng rama yeneac amma kekecna wabade.

<sup>16</sup>Amma ramafocna goa kecdae, yeni oda yomohanac kpac. Nga neng hesicyunuba ubana negenggecede. Ifi anggec ramakpebung mocgu nga ramagareng mocgu anude. <sup>17</sup>Ni kekecna wama monggoc mebadeac amma Manggacngo neac songo negende. <sup>18</sup>Ngic mongngo nearunac kekecna naric mi meickeu ni neannaoc kekecna wabade. Amma kekecna wama monggoc mebade, imocac uayoac nga kuc nearu fede. Imoc Mannango deserinene.”

<sup>19</sup>Yoac imocac amma yudangic yeni monggoc tohogec. <sup>20</sup>Tohoma ngic homac yeneng degec, “Ye yafingagoc kecedeac ubasufu ande. Ngeni nocac yearu kedzac faidae?” <sup>21</sup>Nga ngic tosea yeneng degec, “Yoac ifia ngic yafingnginagoc, yeneac yoac kpac. Yafing yeni kicpisis kiwa naric mi merecgecede.”

<sup>22</sup>Yerusarennu nomang naso anu womong naguya bicngoc desigec, imocac hambannaso anec. <sup>23</sup>Imohai Yesungo womong manau firangmemeac mana mong feec, kpara Saromoac firangmeme mana, ihai kengha anec. <sup>24</sup>Ifi anu yudangic yeneng oronggema edegec, “Ge noc nasou haniaga dekperaginemmena negemma monggoc mi obohonide? Ge Messia kecnecfu imoc deireckenemmena.”

<sup>25</sup>Ifi degec Yesungo yofi merenec, “Imoc bic edengunuai anu ngeni mi negensinggedae. Ni Mannaac kpacfu ua mekecduae, imocngo haniaa mekperagiude. <sup>26</sup>Ngeni ine mi negensinnudae, nocac ngeni neac ramafocna, yeneareunac kpac. <sup>27</sup>Ramafocna yeni ubanaac kedzac faigec ni negengyunuba yeneng modacnugecede. <sup>28</sup>Modacnugec kekecseri yemmeba yeni wiac mongngo naric mi memanganeyunubesande. Nga ngic mongngo marinaunac naric mi mesiyunuude. <sup>29</sup>Mannango yeni nenec, yeng wiac sasawa yeneac engena. Imocac Mannaac mariunac mongngo naric mi mesiyunuude. <sup>30</sup>Ni nga Manggac neri mocgu.”

<sup>31</sup>Ifi deu yudangic yeneng hocngo heigecdeac hoc monggoc megec. <sup>32</sup>Ifi anggec Yesungo yofi edeyunuec, “Manggacac ua gombung homac edzacngunuai. Anu hania damocac ngeni ngaba amma hocngo

nerebesonga andae?” <sup>33</sup>Ifi deu yudangic yeneng merenggec, “Ua gombungaac amma hocngo gerebeso mi andimbe. Ge bangecngicngo geangaac Anutu dema Anutu emminec, imocac amma ine hocngo gerebeso andimbe.”

<sup>34</sup>Ifi degec Yesungo yofi merenec, “Dedeleriyoacnginau yoac yofi oho ohoya fede, imoc mi negendae me? Anutu yengenaoc deec,

‘Ni deba, ngeni sasawango anutuareng.’ *(Mitiyegec 82:6)*

<sup>35</sup>Nga ngic Anutuac enacyoac bicngoc mekecgec, yeneac Anutungo deecfu, ‘Ngeni anutuareng.’ ifi anu Anutuac yoac mitikibiu fede, imoc netohonideac singa mong mi fede. <sup>36</sup>Anu Anutungo ngic meisinggema desima sueu bangecfu maec, imoc ni. Ni yofi bic dedua, ‘Ni Anutuac medac.’ Ifi deaiac ngeni nocac yofi dedae, ‘Ge Anutu emminec.’

<sup>37</sup>Ua mekecduae, imoc Mannaarunac mi andeu ngeni mi negensinnubisia. <sup>38</sup>Nga Mannaac ua mebadeu ngeneng ine mi negensinnuma sifu faka kuhagoc mekecduae, imoc negensinggebisia. Ifi amma Mannango nearu kecde nga neng yearu kecduae, imoc negemma negentegegecde.” <sup>39</sup>Ifi deu yeneng monggoc mendanggebeso anggec, yeng maringinaunac hesima woraec.

<sup>40</sup>Anu Yesungo Yodang doku ferecgema doku noboc Yohanengo doku nadzic ua hanahema meec, ihai kemma kefec. <sup>41</sup>Ihai kecmanu ngicngac homacngo yearu hama degec, “Yohanengo negensinggegecdeac faka kuhagoc mong mi mekefec. Amma ye ngic yomocac hania deec, imoc sasawa sifu fora ande.” <sup>42</sup>Ifi dema bangec imohai ngicngac homacngo Yesu negensinggegec.

**11** <sup>1</sup>Ngic mong kpara Radzaro, ye Betania amau hafei ammiu fec. Nga Maria nga dara Mata yereng ama imohai kefoc. <sup>2</sup>Nga Maria yennoc Kebuac haniu kerec homuna gombungango nadzicmima yengena orucusiangoc mekerenggeec. Nga Mariaac naina Radzaro yenoc hafei ammiac.

<sup>3</sup>Hafei ammiu nainghora yereng Yesuaru yoac faiec kenu deoc, “Kebu negenna, ngic hensongo ammiannec, ye hafei ammiu fede.” <sup>4</sup>Ifi deec kenu Yesungo imoc negemma yofi deec, “Ye homeudeac hafei mi ammiac. Hafei imoc Anutuac kuc nga kibikperagi heficgeucdeac fingece. Fingeru Medahaac kuc nga kibikperagi ifingoc fingecegerude.”

<sup>5</sup>Nga Yesungo Mata muneagoc amma Radzaro yeni heresongogoc hoangyunukefec.

<sup>6</sup>Anu yeng ine siduc imoc negemma uameme yohockang bangec ihaingoc torokpema kefec. <sup>7</sup>Ifi kecmaguc medacfora yofi edeyunuec, “Nenang Yudaia bangecfu dzigenema kenni.” <sup>8</sup>Ifi deu medacfora yeneng degec, “Rabbi, yudangic yeneng hocngo gerebeso anggec nga geng naso mi hereemanu monggoc ihai kennade.” <sup>9</sup>Ifi degec Yesungo yofi merenec, “Uameme mocguac manau aua 12 fede nga ngic mongngo wenacfu sing



kengande, ye naric mi fopockeu makpeude nocac ye bangectoa bangec imocac kperagi henude. <sup>10</sup>Nga mong ye kundunnu kengande, ye fopockeu makpeude nocac yearu kperagia mong mi fede.”

<sup>11</sup>Ifi dema yoac monggoc torokpema edeyunuec, “Nenang ogonina Radzaro gau feu ni midiba yarudeac ihai kembade.” <sup>12</sup>Ifi deu medacfora yeneng degec, “Kebu, ye gau fedeu fekecma ngereeude.” <sup>13</sup>Yesungo Radzaroac homecac deu, yeneng ine negenggec gautehec feu dede isoc anec.

<sup>14</sup>Imocac ye tongganang yofi edeyunuec, “Radzaro ye bic homedac.” <sup>15</sup>Nga ngeni negensinggegecdeac amma ni imohai mi kefaiac ubangerec negenduae. Ngeni yaguc hagec yearu kenni. <sup>16</sup>Ifi deu Toma kpara mong Tombosonga<sup>§</sup> yeng medac ogofora edeyunuec, “Nenang ifingoc yegoc homenideac kenni.”

<sup>17</sup>Yesungo Betania taonnu kensikeu Radzaro ye kicsereu wenac yohoc nga yohoc bic ferahemanu edegec negenec. <sup>18</sup>Yerusareng nga Betania botucngirau kiromita harebec, imocacsoc wegeng wegeng taroc. Imocac <sup>19</sup>Yudangic homacngo naingngiraac amma demeechai ayecmebesonga dema Mata nga Maria yerearu hatacgec. <sup>20</sup>Tacmagec Yesu hade degec Matango imoc negemma meficgeudeac kenu Mariango ine amau tarec.

<sup>21</sup>Taru Matango kemma Yesu edeec, “Kebu, geng yei nenigoc kecbang debac nainna mi homebac. <sup>22</sup>Nga geng yaguc iwai monggac Anutu kpesimina ye naric genude, imoc negenduae.”

<sup>23</sup>Ifi deu Yesungo yofi edeec, “Nainggango gborima yarude.” <sup>24</sup>Ifi deu Matango deec, “Ye naso wisic wisickeau homecfunac yacyac fingeru yarude, imoc negenduae.” <sup>25</sup>Ifi deu Yesungo yofi edeec, “Homecfunac yacyac nga kekec, imoc ninoc. Mong ye ni negensinnude, ye homeude nga sifu kefude. <sup>26</sup>Nga ngicngac yei kecma negensinnudae, yeni sasawango mi homebesandae, imoc negensinggenec me kpac?” <sup>27</sup>Ifi deu deec, “Oc Kebu, ge Messia Anutuac Medac bangecfu mabeso dedeanoc, imoc bic negensingguduae.”

<sup>28</sup>Ifi dema dzigene kemma munea Maria kparu kenu sangicfu edeec, “Kpoukpoungong hatacma geac dede.” <sup>29-30</sup>Anu Yesungo taonnu mi hasikemangoc Matagoc ewaroc ihaingoc nanecac Mariango yoac imoc negemma bic yacma kenec. <sup>31</sup>Kenu yudangic yeneng demeechai hama tacgec, yeni Mariango gereagoc yacma kenu hemma ye kicsereu kiarudeac kende dema modacgec.

<sup>32</sup>Anu Mariango Yesu nanec, imohai kensikema Yesuac haniau makpema edeec, “Kebu, ge yei tacbang debac nainna naric mi homebac.” <sup>33-35</sup>Ifi dema kiaru yudangic yegoc hagec, yeni yenhafoc kiacec Yesungo yenenu ubahodungngong ongaasuya meebiriu negenghodungaima

---

<sup>§</sup> 11:16 Ye ogeagoc foratombosonga fingeroc.

kickumea mamanu deec, “Dahaigeng faigec?” deu degec, “Kebu, hama henna.” <sup>36</sup>Ifi anu yudangic yeneng hemma degec, “Henggec, ye Radzaroac heresongo kuneng femiec.” <sup>37</sup>Nga goa yenearunacngo degec, “Ye warac kicpisc kiwa merecgeec. Nga ye ngic yomoc gombunga garenggeu mi homebac.”

<sup>38</sup>Yesungo monggoc ubaebic mema kicsereu kenec. Kicsere imoc hockedzebe anu hoc mongngo singa hedzickema feec. <sup>39</sup>Feu kensikema edeyunuec, “Ngeni hoc imoc meickegec.” ifi deu ngic homeec, yeac naina Matango deec, “Kebu, ye homunagoc bic andac nocac ye uameme yohoc nga yohoc bic kendac.” <sup>40</sup>Ifi deu Yesungo edeec, “Ge negensinggenadeu Anutuac kuc kibikperagiagoc hennade, ifi bic edegudua.”

<sup>41</sup>Ifi deu hoc meickegec Yesungo kic fiu enu yofi deec, “Manggac, ge yoacna bic negendang, imocac geac dangge deduae. <sup>42</sup>Ge nasosoc nunumuna negengannec, imoc bic negendua. Anu geng ni suenunec, imoc ngichabu yoc nandae, yeneng negensinggegecdeac ifi edegudua.” <sup>43</sup>Ifi dema Yesungo kucgoc kpacma deec, “Radzaro, ge yacma ngadeau mana.” <sup>44</sup>Ifi deu ngic homemea hanimaria nga kicmesuya kporucsusucngo kpefusema birac biranggea, imocngo yacma maec. Mau Yesungo edeyunuec, “Ngeni yungecmigec kenu.”

<sup>45</sup>Yudangic homacngo Maria hembeso hagec, yeni Yesungo ua meec, imoc hemma ye negensinggegec. <sup>46</sup>Ifi anggec, yenearunac goango ine farisaio yenearu kemma Yesungo faka meec, imocac siduc ayemmegec. <sup>47</sup>Ayemmegec womong gareng enarafocngina amma farisaio, yeni tutumangtoaac memba kpedzucyunuma yofi degec, “Ngic yomoc ye negensinggegecdeac faka kuhagoc homac medeac nenang dafi anni? <sup>48</sup>Ye wani kecma faka ifia torokpema meudeu ngic sasawango ye negensinggegec Roma yeneng hama amawomonnina nga ngicngacfocnina wangecnunubauac.”

<sup>49</sup>Ifi degec, yenearunac mong kpara Kaifa, ye kifa imohai womong gareng enara kefec, yeng yofi edeyunuec, “Ngeni wiac mong mi negentegecdae. <sup>50</sup>Ngicngac areng sasawa mi kpac anggecdeac ngic moggungo bangec areng yeneac amma homeu ngereeude, ngeni imoc mi negentegecdae me?” <sup>51</sup>Yoac imoc yengena ubeaac negemma mi deec. Yeng kifa imohai yudangic yeneac womong garengtoa kefec, imocac kpefing deec. Yesungo bangec areng yeneac amma homeudeac ifi anec. <sup>52</sup>Ye yeneacsac homeudeac mi maec. Ye Anutuac nambaracfora sinsararang kpegec kecdae, yeni kpedzucyunuu areng mocgu anggecdeac ifi deec.

<sup>53</sup>Ifi deu naso imohaingoc Yesu kpegecdeac hanahema dekiric anggec. <sup>54</sup>Ifi anggec Yesungo negemma yudangic yeneac botucfu monggoc nonongkac mi yerecgekefec. Ye ine worama Eferaing ama bangec kisi wegenacfu feec, ihai medacfora yenigoc kemma kefec.

<sup>55</sup>Yudangic yeneac makekeng hombang naso wegene hamanu ngicngac homacngo Anutuac kicfu kpetiac anggecdeac dzuacemegecde, imocac amma amangina wama Yerusarennu kenggec. <sup>56</sup>Kemma womong manau namma Yesu hofocma yenaocngoc kpesiemegec, “Ye hobbanninau haude me dafi negendae?” <sup>57</sup>Nga womong gareng enarafocngina nga farisaio yeneng deserima ngicngac yofi edeyunugec, “Yesu dahai kecde, imoc mongngo meficgema edenunugec mendanggema mebisina.”

**12** <sup>1</sup>Makekenggac hombang imocac wenac 6 femanu Yesungo Radzaroac taonnu Betania, ihai kenec. Yesungo ngic yenoc homecfunac megboriec. <sup>2</sup>Yeni imohai Yesuac amma yaka gombunga ohogec Matango yaka faima arenggeu negec. Nga ngic Yesugoc tacma yaka negec, yeneartunac mong Radzaro. <sup>3</sup>Tacmagec, imohai Mariango sebiac kerec lita noboha, kpete imocacsoc mema Yesuac haniau kpakema nadzicmiec. Kerec, imoc narda foranac memea<sup>h</sup> amma imocac buma kuneng. Nadzicmima orucdzoeango hania meuranggeec. Ifi anu kerec imocac homunango fima ama mana sokodacma feec.

<sup>4</sup>Anu medacfora yeneac botucfunac medac mong Yuda Kariotonac, yennoc ngade Yesu doc meudeac anec amma yeng deec, <sup>5</sup>“Nenang kerec imoc faini kifa mocguac uabunggac dzo kirecgeu<sup>i</sup> ngic makpekpea yemmebing, imocngo ngereebac.” <sup>6</sup>Yuda ye imoc ngic makpekpea yeneac negensima mi deec, kpac. Ye ine hamangecngicac amma dzohiangina garenggekecma dzo hamangec menec angkefec. <sup>7</sup>Ifi deu Yesungo deec, “Ge ngac imocac yoac wana. Ye kerec imoc faiu femanu homeba naso imohai eng tonggonubauac amma nadzicnende. <sup>8</sup>Ngic makpekpea yeni nasosoc ngenigoc kecgecde nga neng ine ngenigoc nasosoc mi kecbade.”

<sup>9</sup>Anu yudangic homacngo Yesungo Betania taonnu kecde, ifi negemma Yesuacsac mi kenggec. Yeni Yesungo Radzaro homecfunac megboriec, ye momoc hembeso kenggec. <sup>10-11</sup>Ifi fingeru yudangic homacngo Radzaroac amma enara yeneac dede wama Yesu negensinggec. Imocac womong gareng enara yeneng Radzaro ifingoc kpegecdeac yoacua megec.

<sup>12</sup>Wereckengau ngicngac habutoango hombanggac Yerusarennu kenggec. Kemma Yesungo Yerusarennu haudeac wegenanec hade, ngicngac yeni ifi negemma <sup>13</sup>ic maria dzuamagoc mema Yesugoc ewacgecdeac sinnu kenggec. Kemma yofi kpacgec,

“Ohec, ngic KEBUAC kpacfu hade, ye kenehagoc. (Mitiyegec 118:26)  
Yeng Israe neneac Ngictau.”

<sup>14</sup>Ifi kpacgec Yesungo donggi medaha mong meficgema imohai emma tarec. Imocacnoc yofi oho ohoya fede,

<sup>15</sup>“Sionggac naroang ge mi kengecguu. Henna, ngictaugango donggi medahaac witiau tacmanu haude.” (Dzekaria 9:9)

<sup>h</sup> 12:3 Narda imoc dzaring mong marikomoc. Dokuya homunagoc imocngo kerec, imoc memea. <sup>i</sup> 12:5 Ye denari 300 deec.

<sup>16</sup>Faka fingerecfunac medacfora yeneng imocac hania mi negenghomegec. Kecma Yesungo kuc nga kibikperagiagoc anec, naso imohai ine faka ammigec nga yoac yeac negemma oho ohoya fede, imoc negengireckegec. <sup>17</sup>Anu ngichabu yeni Yesugoc kemma Radzaro kicsereunac kpacma homecfunac megboriu henggec, yeneng siduc imoc desahegec. <sup>18</sup>Ye faka kuhagoc imoc meecac amma habutoango yegoc ewacgecdeac kenggec. <sup>19</sup>Ifi anggec ine farisaio yeni yenaocngoc denengeng amma degec, “Negenggec, nenang wiac mong anganggac siriha kpac. Ngicngac kpedzongacngo ye modacma kendacdae.”

<sup>20</sup>Anu ngicngac hombanggac Anutu afehegecdeac Yerusarennu kenggec, yeneac botucfu griknigc goa momoc kecgec. <sup>21</sup>Kecma Firipoaru hama degec, “Ngickuneng, neni Yesu hembeso negendimbe.” nga Firipo ye Gariraia bangec Besaida taonnunac. <sup>22</sup>Ifi degec Firipongo hama Anderea edeu yerahafoc kemma Yesu edeoc.

<sup>23</sup>Edeec Yesungo yofi meremma edeyuruec, “Ngicac medac ye kuc nga kibikperagiagoc anudeac nasoya hade. <sup>24</sup>Foracngoc, wit gbomea mong bangecfu mi kemema tohoudeu imoc yengenaocsac tarude, imoc edengunuduae. Nga bangecfu kemema tohoudeu imocngo fora homac meficgeude. <sup>25</sup>Ngic mong ye sebiaac kekecac songo negengande, ye kekeha sufumiude. Nga sebiaac kekec bangec yomohai ubeango waande, yeng kekeha mekecma kekecseri meficgeude. <sup>26</sup>Nga ngic mong ye kingang kpekpena ambeso negendeu ye ni modacnubeso. Nga ni kecbade, ye imohai ifingoc nigoc kefude. Nga ngic mong ye neac kingang kpeudeu, Mannango ye seseheude.”

<sup>27</sup>Amma Yesungo monggoc deec, “Yaguc ubaongana ebiriu dafi debade? Manggac, ge naso yomohacnac ongonnuna. Nga neng ine imocac ammanoc naso yomohai hasikeduae. <sup>28</sup>Manggac, ge kpacga mekperagina.”

Ifi demanu kurumennunac udumeng mong yofi fingerec, “Ni kpacna bic mekperagiai amma monggoc mekperagibade.” <sup>29</sup>Yoac ifi fingecmanu ngicngac habutoa nanggec, yeneng udumeng imoc negemma degec, “Parandangngo heide.” Nga toseango ine degec, “Angero mongngo yegoc yoac dede.” <sup>30</sup>Ifi degec Yesungo yofi deec, “Udumeng imoc neac amma mi hadac, kpac. Imoc ngeneac memeficac fingecdac. <sup>31</sup>Yaguc bangectoa bangec imocac ngicngac fakangina ising isinggenaso nga yoacngina desigece. Amma bangec yomocac ngictau meickegece. <sup>32</sup>Anu ngic yeneng bangecfunac miacnugec ni emma ngicngac sasawa kpedziyunuba nearu hadacgece.” <sup>33</sup>Yengena siric dafiu homeude, imocac dekperagima edeyunuudeac ifi deec.

<sup>34</sup>Ifi deu ngic habutoango meremmigec, “Dedeseriyoacfu yofi degec negengandimbe, ‘Messiango fingecma nasoya kpac, kechereema kefude.’ Anu ge dafi denec, ‘Ngic yeneng Ngicac Medac miacgec embeso.’ Nga

Ngicac Medac imoc merak?” <sup>35</sup>Ifi degec Yesungo deec, “Kperagingo naso wegenaneacsac ngenigoc kefude. Kundungac kucngo semengunubacac ngeni kperagi fengemmemanu kperagigoc kecbisia. Ngic mong ye kundunnu kengkecde, ye sing dafiu kende, imoc naric mi negentegerude. <sup>36</sup>Imocac amma ngeni kperagingo ngenigoc femanungoc kperagi imoc negensinggebisia. Ifi angkecma kperagiac nambaracfora anggecde.” Yesungo ifi dema wayunuma yenearunac meickeec.

<sup>37</sup>Yesungo faka kuhagoc homac kicnginau meu yeni ine ye mi negensinggegec. <sup>38</sup>Profete Yesaiiac yoac yomoc fora fingecceso, “Kebu, yeni yoac dekperaginemmegec, imoc ngic merak negensinggeec amma meracaru KEBUAC mariseri fingeccie.”  
(*Yesaiia 53:1*)

<sup>39</sup>Imocac amma yeni naric mi negensinggegec. Amma Yesaiango yoac mong yofi torokpema deec,

<sup>40</sup>“Yeni kicnginango mi henggecdeac kicngina mekundung kpeec amma faka meu ubangina dzingfong anu mekundung kpeyunuec nga ubadzigec dzigene mi fingeccyemmemanu mengereyunubaiac.”  
(*Yesaiia 6:10*)

<sup>41</sup>Yesaiango Yesuac kuc kibikperagiagoc henecac yeac negemma yoac yomoc deec.

<sup>42</sup>Ammanu ngickiwa botucnginaunac homacngo Yesu negensinggegec nga farisaio yeneng ine kpebunggac ngadeau faiyunubauac yeni imoc mi dekperagiyemmegec. <sup>43</sup>Ngic yeneng dedengerec ayemmegecdeac songotoa feyemmeec nga Anutungo dedengerec ayemmeudeac wagec.

<sup>44</sup>Anu Yesungo kucgoc kpacma yofi deec, “Ngic mong ni negensinnude, ye nisac kpac, ye suenuec, ye ifingoc negensinggeude. <sup>45</sup>Nga mong ye nende, yeng suenuec ifingoc henude. <sup>46</sup>Nga ngicngac negensinnudae, yeni sasawango kundunnu monggoc mi keccgecde nocac bangeccfu kperagia mama fingecctegerec, imoc ni. <sup>47</sup>Ngic mong ye yoacna negemma mi tofohoudeu neng fakaya mi isinggema desibade, kpac. Ni ngicngac fakangina isinggema desibadeac mi mayai. Neng ine ngicngac ebicfunac mesiyunubade nga yeni komoc kpeccgecdeac mayai.

<sup>48</sup>Anu mong ye ngadenuma yoacna mi hoanggeude, wiac mongngo fakaya isinggema desimiude. Yoac deai, imocngonoc naso wisic wisicceau fakaya isinggema desiude. <sup>49</sup>Ni neanna ubanaac yoac mi deanduae, kpac. Manggac suenuec, yeac yoac debadeac dederecce anenec. <sup>50</sup>Yeac dedeseriyoac imoc keccseri, imoc negenduae nga imocac amma Manggac yoara edenuc, imocngoc debade.”

**13** <sup>1</sup>Makekenggac hombang nasoac tofocnac mocgu femanu Yesungo bangec yomoc wama Manggacaru dzigeneudeac nasoya wegeneec, imoc bic negengemeec. Ifi negemma bangeccfu wiaccfora yeneac heresongoya fekefec, imoc hafoangoc edzacyunumaguc kekeha

wisickebeso, ifi negenec. <sup>2</sup>Yeni maraiac yaka nema tacgec. Nga mangana minginango negen negeng Yuda, Simong Kariotoac medac ubeau bic yofi faiec, yeng Yesu docfu faiu ngaba yeneng mebisia.

<sup>3</sup>Nga Mamango wiac sasawa Yesuac mariaui bic faiec nga ye Anutuarunac mama monggoc dzigene enude, ye imoc bic negenec. <sup>4</sup>Negemma tataha wama yacma ngakpi hereha hesima keremmeme mong mema kebangau dzegeec. <sup>5</sup>Dzegema tera yadaosong, imohai doku kpeu kemeu medacfora yeneac hani dzuacyemmema keremmeme kebangau dzegeec, imocngo haningina mekerenggeyemmeec.

<sup>6</sup>Ifi amma Simong Petoroaru kenu Petorongo kpesimiec, “Kebuna, ge dafiad hanina dzuacnade?” <sup>7</sup>Ifi deu Yesungo yofi edeac, “Ni faka anduae, ge yaguc imocac hania mi negentegecnec amma ngadeguc hania negentegecnade.” <sup>8</sup>Ifi deu Petrongo deec, “Kpac yombong, ge neac hani mi dzuacnade.” deu Yesungo meremmiec, “Ni haniga mi dzuacbadeu, ge nearu mi tahockenade.” <sup>9</sup>Ifi deu Simong Petorongo deec, “Kebuna, ge haninasac kpac, orucna nga marina momoc dzuacnenna.”

<sup>10</sup>Ifi deu Yesungo yofi deec, “Ngc mong ye doku bic nadzirec, ye hafoangoc kongac kpeecac monggoc mi nadzicma hianasac dzuacbesonga. Ngeni kongac bic kpegec amma imoc ngeni sasawa ngeneac ine mi deduae.” <sup>11</sup>Nocac ngic merang ye doc meu megecede, imoc bic negenec. Imocac yofi deec, “Ni sasawa ngeneac imoc mi deduae.”

<sup>12</sup>Yesungo haningina dzuacdaru wisickeu ngakpi hereha heiu kemeu monggoc matacma yofi kpesiyemmeec, “Ni faka ngenearu medua, imocac hania negentegecdae me? <sup>13</sup>Ngeni neac kpoukpou nga Kebu kpacnuandae, imoc naric deandae, nocac ni imocnoc. <sup>14</sup>Ni Kebu nga kpoukpounginango haningina dzuacduaeu ngeni ngenaoc ifingoc haningina dzuacemebisia. <sup>15</sup>Ni faka gombungaac ongea edzacngunuma angemmeduae, siriha imocngoc ngenaocngoc modacma mebisia.

<sup>16</sup>Foracngoc, wanacngicngo mingina mi feraheude nga sue sueango ngic sueec, ye mi feraheude, imoc edengunuduae. <sup>17</sup>Ngeni yomoc negemma modacgecdeu Anutuac ubangerecngo ngenearu feude.

<sup>18</sup>Ni sasawa ngeneac mi deduae. Meisingngunuai, ngeni ine negengngunuduae. Amma yoac mitikibiu oho ohoya fede, imoc fora fingerudeac yoac yomoc heficgeec,

‘Ngc nigoc yaka neande, ye gofoc gofohango tifaacnuudeac bic hania miacde.’ (Mitiyegec 41:9)

<sup>19</sup>Faka imoc fingerude nga, ‘Ni kecduaengoc.’ ngeni imoc negensinggegecdeac amma yaguc faka imoc mi fingecmanu imocac siriha edengunuduae. <sup>20</sup>Foracngoc, ni ngic me ngac mong sueba hau mongngo ama heimiude, yeng ni ama heinende ande. Anu ngic mong ye ni ama heinenude, yeng suenuec, ye ama heimiudengoc.”

<sup>21</sup>Yesungo yoac imoc demanu ongaasuya ebiriu yoac yofi dekperagiec, “Ni fora yombong edengunuba, ngeneac botucfunac mongngo docfu

fainuu menugecde.”<sup>22</sup> Ifi deu medacfora yeni yenaocngoc kicngo engemma degec, “Imoc meracac dede?” ifi dema obohogec.<sup>23</sup> Nga medacfora yeneac botucfunac songomedaha yeng Yesuac hoannu tarec.<sup>24</sup> Ifi taru Simong Petoro ye hatango sosoc yofi anec, “Ge kpesimina, imoc meracac dede?”

<sup>25</sup> Ifi deu medac imoc Yesuac mokuclu heifema kpesimiec, “Kebu, ge imoc meracac denec?”<sup>26</sup> Ifi deu Yesungo deec, “Ni ic sogong tosea yomoc nemuruckema ngic mong mibade, ngic imocnoc.” Ifi dema ic sogong mema nemuruckema Yuda, Simong Kariotoac medac miec.

<sup>27</sup> Miu ic sogong meu Satangngoc hereau kemeec. Kemeu Yesungo yofi edeac, “Ge ua mebeso negennec, imoc kemma bic mebesena.”<sup>28</sup> Ifi deu medacfora tacgec, yeneng noc wiacac edede, imocac obohogec.<sup>29</sup> Imoc yofiac, Yuda ye dzohie mekefecac hombanggac wiac mong bummeudeac edede me ngic makpekpea wiac mong yemmeudeac dede, ifi negenggec.<sup>30</sup> Nga Yudango ic sogong tosea memanu imohaingoc yacma kemeec. Nga tofocnac naso yombong bic anec.

<sup>31</sup> Anu Yesungo yofi deec, “Yaguc Ngicac Medacngoc kuc nga kibikperagiagoc fingectegecde. Fingectegeru ngicngac yeni Ngicac Medac uayaac amma Anutuac kuc nga kibikperagia negenggecde.<sup>32</sup> Ngicngac yeni Medac hemma Anutuac kuc nga kibikperagia negenggecdeu Manggacngoc Medahaac kuc nga kibikperagia ngicngac mekperagiyemmeude, imocac naso wegenede.<sup>33</sup> Nambaracfocna, ni naso wegenanec ngenigoc kecmangoc kema ngeni ni hofocnugecde. Anu yudangic edeyunuai, imocngoc yaguc edengunuduae. Ni kembade, imohai ngeniac hahaac sing mong mi fede, kpac.<sup>34</sup> Singyoac gboria mong ngemmeduae, ngeni ngenaocngoc heresongogoc hoangemebisia. Neng ngeni heresongogoc hoangngunukecduae, ngeni ifi isoc ngenaocngoc heregoc tembut tembut songogoc hoangemebisia.<sup>35</sup> Ngeni ngenaocngoc heresongogoc hoangemegecdeu ngicngac sasawango ngeni neac medacfocna kecdae, imoc negenggecde.”

<sup>36</sup> Ifi deu Simong Petorongo kpesimiec, “Kebu, ge dahai kennade?” ifi deu Yesungo yofi deec, “Ge yaguc ni kembade, imohai naric mi modacnunade, kecma ngadeguc modacnunade.”<sup>37</sup> Ifi deu Petorongo monggoc kpesimiec, “Kebu, ni nocac yaguc naric mi modacgubade? Ni geac amma kekecna naric waba doude.”<sup>38</sup> Ifi deu Yesungo meremma yofi edeac, “Ge naric neac amma kekecga wana doude, ifi denec me? Foracngoc, ni edegubade, kokorecngoc mi arohomanu geng atac harebec neac busic kpenade.”

**14** <sup>1</sup> Ngeni ubaebic mi mebisia. Ngeni Anutu negensinggema ni ifingoc negensinnubisia. <sup>2</sup> Neac Mannaac amau amamana homac fekende. Imoc mi febac dede yofi bic edengunubai, “Ni ngeniac ama mana mengerebadeac kembade. <sup>3</sup> Amma ngeniac amatatac

heitumeibadeac kemma dzigene hama hesicngunubade. Ni kecbade, ihai nenahafoc kecnideac negenduae. <sup>4</sup> Amma dahai kembade, ngeni imocac sing bic negendae.”

<sup>5</sup> Anu Tomango kpesimiec, “Kebu, ge dahai kennade, imoc mi negendimbe. Imocac sing dafi negentegecnide?” <sup>6</sup> Kpesimiu Yesungo yofi deec, “Ninoc sing nga yoac fora amma kekec. Ngic mongngo nia kpacfu Manggacaru keng keng imocac sing mong mi fede. <sup>7</sup> Ngeni ni negennudaeu Manna ifingoc negemmigecde. Amma ngeni yaguc namma enude imohai ye negemmima bic hendae.”

<sup>8</sup> Ifi deu Firipongo deec, “Kebu, ge Manggac edzacnununa henni socnunuede.” <sup>9</sup> Ifi deu Yesungo yofi edeac, “Firipo, ni naso herea ngenec botucfu kecbare ge mi negennunec. Ngic mong ye nenec, yeng Manna henec. Nga dafiac Manggac edzacngunuba henggecdeac denec? <sup>10</sup> Ni Manggacac hereu kecduae nga Manggacngo neac hereu kecde. Ge imoc mi negensingenec me? Yoac edengunuanduae, imoc neanna ubaac mi debade, kpac. Manggacngo neac hereu kecma ua imoc mekecde. <sup>11</sup> Ngeni yoacna yomoc negensingegec, ni Manggacac hereu kecduae nga Manggacngo neac hereu kecde. Ifi deba obohogecdeu uana meanduae, imoc negensingebisia.

<sup>12</sup> Foracngoc, mong ye ni negensinnude, ye ni ua meanduae, imocngoc meude, imoc edengunuduac. Amma ua mekefai, yeng imoc ferahema monggoc meude, nocac ni Manggacaru kembade. <sup>13</sup> Medacngo Manggacac kuc nga kibikperagi heficgeudeac amma ngeni wiac sasawa neac kpacfu kpesigec, imoc ambade. <sup>14</sup> Amma wiac monggac neac kpacfu kpesinenggecdeu ni imoc ambade. <sup>15</sup> Ngeni heregoc neac songo negenkecdaeu singyoacna modacgecde.

<sup>16</sup> Anu neng Manggac kpesimiba yeng memeseringina mong ni isoc ngemmeu yeng ngenigoc nasosoc kefude. <sup>17</sup> Amma ye yoac foraac Asu. Nga bangecfunac ngicngac yeni ye naric mi megecde. Yeni ye mi hengandae nga ye mi negemmigecde. Nga ngeneng ye negemmidae, ye ngenec botucfu amma herenginaunoc kefude. <sup>18</sup> Nga wangunuba beging isoc mi kecgecde, kpac. Ni ngenearu habade. <sup>19</sup> Naso wegenanec wisickeuguc bangectoa bangec imocac ngicngac yeneng ni monggoc mi nenggecde nga ngeneng ine nenggecde, nocac ni kecduaeac amma ngeni kecgecde.

<sup>20</sup> Ni Mannaac hereu kecduae nga ngeni neac hereu kecdae amma ni ngenec hereu kecduae, ngeni naso imohai imoc negentegecgecde. <sup>21</sup> Ngic mong ye neac singyoac hoanggema modacande, ye heregoc neac songo negenude. Nga mong ye heregoc neac songo negenudeu Mannango yeac songo ifingoc negenude. Amma neng yeac songo negemma fingeccmibade.”

<sup>22</sup> Ifi deu Yuda Kariotoac waseango Yesu kpesimiec, “Kebu, ge nenisac fingeccnemmesongna negensinec nga bangectoa bangec, imocac ngicngac



yenearu kpac, imoc dafiac?” <sup>23</sup>Ifi deu Yesungo yofi meremmiec, “Ngic mong ye heregoc neac songo negendeu ye enacyoacna modarude. Modaru Mannango yeac songo negenu nereng yeac hereu amatatacnira mema kecdede. <sup>24</sup>Nga mong ye heregoc neac songo mi negenude, ye enacyoacna mi modarude. Nga ni yoac deba negengandae, imoc neac yoac kpac, imoc Manggac suenuec yeac yoacnoc.

<sup>25</sup>Ni ngenigoc kecma yoac yomoc edengunuduae. <sup>26</sup>Nga Manggacngo memeficngina Tiri Asu neac kpacfu sueu mama yeng wiac sasawa kpoungemmema yoac edengunuai, imoc heigboringemmeude. <sup>27</sup>Ni faingunu kembade nga ruaena faiduae, imocngo ngenearu fekefude. Bangectoa bangecac ngicngac yeneng ruae yemmeandae, ruaena imoc ifi isoc kpac. Imocac ngeni kengec mi ambisia amma ubaebic mi mebisia.

<sup>28</sup>Ni Manggacaru kemma monggoc ngenearu dzigene habade, ifi deba negendau. Amma ngeni heregoc neac songo negendae isoc sogaibau nocac Manggac yennoc neac engena. <sup>29</sup>Nga kembadeac fora ngadeguc fingectegeru ngeni negensinggecdeac amma kembadeac fora mi fingecmanungoc siduha yaguc edengunuduae.

<sup>30</sup>Ni naso herea monggoc ngenigoc yoac yoac mi ambade. Bangectoa bangec yomocac ngictau haude. Nga yeac wiac mong neac hereu mi fede. <sup>31</sup>Ni Manggacac songo negengkecduae. Amma yeng uayoac deserinene, imocac sirihau ua mekecduae, bangectoa bangec yomocac ngicngac yeneng imoc negentegecgecdeac amma deduae, ngeni yacgec wama kenni.”

**15** <sup>1</sup>Ni waing ic fora nga Mannango wainguaac mingina. <sup>2</sup>Ic fawa goa nearu fema fora mi angkecgec ye imoc sasawa kperecgema ukuyunuude. Nga fawa fora angandae, imoc sasawa foraya homac anudeac ye imoc kperecgema memengere anude. <sup>3</sup>Ni enacyoac edengunuaiac ngeni bic kongac kpegec kecdae. <sup>4</sup>Amma ngeni nigoc kpeketahema kecbisia. Ifi anggec neng ngenigoc kpeketahema kecbade. Ic fawango waing icfu mi kpeketahendeu, ye fora naric mi anude. Ifi isocngoc ngeni nearu mi kpeketahema kecgecdeu fora mong mi anggecde.

<sup>5</sup>Ni neannaoc waing ic nga ngeni fawafocna. Ngic mong ye nearu kpeketahema kecde, neng yearu ifingoc kpeketahema kecba yeng fora homac anude. Ngeni nia kpacfu ua mong naric mi megecde. <sup>6</sup>Mong ye nearu mi kpeketahema kefudeu ye ngicngo fawa heregema ukuu dzanggeande, ifi isoc ye ukugecde. Nga fawa ifia kpedzucnema gerecfu ukugec dzeude. <sup>7</sup>Ngeni nearu kpeketahema kecgecde nga neac yoac ngenearu kpeketahema feudeu wiac monggac angemmeu kpesigec, imoc fingecngemmeude. <sup>8</sup>Nga ngeni fora homac meficgemagec Manggacngo faka imocac kpac kuneng meu ngeni medacfocna fingectegecgecde.

<sup>9</sup>Manggacngo ni songogoc hoannukefec, neng ifi isocngoc ngeni songogoc hoangngunukefai. Ngeni neac songo manau kpeketahema

kecbisia. <sup>10</sup>Ni Mannaac dederecege yoac modacma yeac songo manau kpeketahema kecduae. Ifi isoc ngeneng neac singyoac modacgecdeu neac songoac manau kpeketahema kecgecde. <sup>11</sup>Neac ubafeacngo ngenearu fede nga ubangerecngina hafoangoc fengemmeudeac yoac yomoc edengunuduae.

<sup>12</sup>Yomoc neac singyoac, neng ngeneac songo negengkecduae, siriha imocngoc ngeni ngenacngoc heresongogoc hoangemema kecbisia.

<sup>13</sup>Mong ye ogofora yeneac amma kekeha waude, yeac heresongo imoc engena yombong. <sup>14</sup>Nga ni singyoac ngemmeai, imoc sasawa modacgecdeu ngeni neac ogofocna anggecde.

<sup>15</sup>Kingangmedac ye minginango wiac angkecde, imoc mi negenude. Imocac ni ngeneac kingangmedac monggoc mi debade, kpac. Ni ngeneac ogofocna deduae, nocac ni Manggacarunac yoac negennai, imoc sasawa edengunudarai. <sup>16</sup>Anu ngeni neac kpacfu wiac monggac kpesigec Manggacngo imoc ngemmeudeac amma neng meisingngunuai. Ngeneng ine ni mi meisinnugec, kpac. Meisingngunuma fora meficgegecdeac uau faingunuai. Nga ngeni kemma fora meficgebisia. Meficgegec fora imocngo fefeseri feengkefude. <sup>17</sup>Anu ni singyoac yofi ngemmeduae, ngeni ngenacngoc heregoc songo negengemekecbisia.

<sup>18</sup>Bangectoa bangec yomocac ngicngac yeneng ubango ukungunudaeu ngeni yofi negembisia. Yeni ubango ngeni mi ukungunugec imohai ni ubango bic ukunugec. <sup>19</sup>Ngeni bangectoa bangec yomocac ngicngac kecbau yeni yenang ayemmeande, ifi isocngoc ngeneac songo negembau. Nga ngeni ine bangec yomohanac kpac, neng ine ngeni bic meisingngunuma bangec yomocac ngicngac yeneacngoc meicngunuai. Imocacnoc yeneng ngeni ubango ukungunugecde. <sup>20</sup>Ni yoac warac edengunuai, imoc mi nigecongubeso, wanacngicngo mingina naric mi feraheude. (*Yohane 13:16*) Imocac amma ngicngac nukporac anenggec, yeni ifi isocngoc ngeni ngunukporac angemmegecde. Nga neac yoac hoanggeandaeu ngeneac yoac ifingoc hoanggegecde. <sup>21</sup>Yeni suenuec, ye mi negemmidae. Imocac yeni neac kpacnaac amma ngeni ifi angemmedacgecde.

<sup>22</sup>“Ni mama yenearu yoacna mi debai dede yeni kopocsicngina kpac kecbau. Amma yaguc ine kopocsicnginaac amma degbedic anggecdeac sing mong mi fede. <sup>23</sup>Ngic mong ye ubango wanude, ye ifingoc Manna ubango waude. <sup>24</sup>Ni ua mekecduae ngic mongngo faka kuhagoc ifia bicngoc mi meec, imoc yeneac botucfu mi mebai dede, yeni kopocsicngina kpac kecbau. Nga yeni ine imoc yaguc hemmaguc Mannagoc neri ubango ukunurugec. <sup>25</sup>Anu yoac yomoc,

‘Yeni hania kpacfu ubango ukunugec.’ (*Mitiyegec 35:19; 69:4*)

imoc dedeseriyoacnginau oho ohoya fede nga imocngo hafoangoc fingerudeac ifi anggec.

<sup>26</sup>Memeficngina haude, ye Manggacarunac suengemmeba haude amma yennoc yoac foraac Asu nga yeng hama ni dekperaginuude. <sup>27</sup>Nga ngeneng hanac hanaheaunacngoc nigoc kecgec, imocac ngeni ifingoc naric dekperagingeude.”

**16** <sup>1</sup>Ngeni negemmangang amma mi wanugecdeac yoac yomoc bic edengunudu. <sup>2</sup>Ngic yeni kpekpeturang amaac kpae heingemmema ngadeau faingunugecde. Nga naso mong haude, imohai ngic yeni Anutuac ua medimbe dema ngunuhomegecde. <sup>3</sup>Yeni Manggac nga ni mi negennurudaeac ifi anggecde. <sup>4</sup>Ni hanac hanaheaunacngoc yoac imoc mi edengunuai nocac ni naso imohai ngenigoc kefai. Nga naso mong haude, imohai ni yoac edengunudu, imoc mi nigecongunuudeac amma yaguc monggoc edengunudu.

<sup>5</sup>“Ni suenuc, yearu dzigenebadeac naso wegene hade. Nga ngenearunac mongngo yofi mi kpesinende, ‘Ge dahai kennade?’ <sup>6</sup>Neng yoac yomoc edengunuduac ine ngeni ubahodungngo mewakengunuude. <sup>7</sup>Ni yoac fora edengunudu, ni kembade, imocngo ngenearu ngereude. Ni mi kembadeu memeficngina naric mi haude. Neng kemma ye sueba ngenearu haude. <sup>8</sup>Yeng hama bangectoa bangec yomocac ngicngac kopocsicngina nga faka dindingac amma desi desiuac imoc edzacyunuma heficgemyemue negenggec fora anude. <sup>9</sup>Kopocsicac hania yofi, yeni ni mi negensinnudae. <sup>10</sup>Nga faka dindingacac hania yofi, ni Manggacaru emba ngeni mi nenggecde. <sup>11</sup>Amma desi desiac hania yofi, bangectoa bangec yomocac ngictau ye yoacfu bic makpeec.

<sup>12</sup>Nga nearu ngeneac yoac homacngoc fede. Nga ngeni ine yaguc imoc tofohoma mekecgecdeacsoc mi ande. <sup>13</sup>Yoac foraac Asu maude, yeng yoac forau mekpedzuc angemmedarude. Amma ye yengena ubeaac yoac mi deude. Ye Anutuarunac yoac negengande, imoc deude nga faka ngadeu fingeibesande, imocac momoc edengunuude. <sup>14</sup>Ye ni dekperagingemmema kpac kuneng nenude, nocac ye neanna ubatohonnunac yoac imoc meude. <sup>15</sup>Manggacaru wiac sasawa fede, imocac mingina ni. Imocac amma yofi deduae, wiac sasawa Asungo mema dekperagingemmeude, imoc nearunac. <sup>16</sup>Ngeni naso wegenanec mi nenggecde nga naso wegenanec monggoc fede, imohai nenggecde.”

<sup>17</sup>Ifi deu medacfora goa yenaocngoc kpesiemegec, “ ‘Naso wegenanec fede, imohai mi nenggecde nga naso wegenanec monggoc fede, imohai nenggecde.’ yoac imocac hania dafi? Amma monggoc dedac, ‘Ni Manggacaru kembade.’ ” <sup>18</sup>Anu negenggec obohohou degec, “Naso wegenanec fede, imocac hania dafi? Neni yoac imocac hania obohohodimbe.”

<sup>19</sup>Medacfora yeneng kpesimibeso anggec Yesungo imoc bic negemma yofi edeyunuac, “Naso wegenanec fede, imohai mi nenggecde nga naso wegenanec monggoc fede, imohai nenggecde. Imocac ngenaocngoc

kpesiemedae me? <sup>20</sup>Foracngoc, ngeni kiac songgong ammagec bangectoa bangec yomocac ngicngac yeneng sogai gecde, imoc edengunuduae. Nga ngeni ubahodung anggec ubahodungngina imocngo merennu ngeni ubangerec monggoc meficge gecde. <sup>21</sup>Ngac mong ye medacmeme nasoya wegene hau kpendzeng kpema sabac meude. Sabac mema ye kpendzeng imoc nigeckpeude. Ye sabac bangecfu bic finge cda c, imocac amma sogaiude. <sup>22</sup>Ngeni imocacsoc yaguc ubaebicgoc ke cdae. Amma monggoc ngenemba imohai ngeni ubangerec negemma sogai gec ngic mongngo sogac sogaingina imoc naric mi meickeude.

<sup>23</sup>Anu naso imohai ngeni wiac monggac mi kpesinengge cde, kpac. Foracngoc, ngeni wiac monggac neac kpacfu Manggac numumigec yeng imoc ngenmeude, imoc edengunubade. <sup>24</sup>Ngeni warac neac kpacfu wiac monggac mi numuke gec. Nga sogac sogainginango hafoangoc fengemmeudeac ngeni wiacac numuma mebisia.

<sup>25</sup>Ni yoac heima yoac edengunukefai. Kecma nasoya hau ni yoac heima ngenearu monggoc mi debade, kpac. Ni didiu yombong Manggacac wiac dekperagibade. <sup>26</sup>Naso imohai ngeni neac kpacfu numuge cde. Nga neng ngeneac amma Manggacaru numubade, imoc mi deduae. <sup>27</sup>Ngeni heregoc neac songo negendae nga ni Manggacaru hayai, imoc negensingege cde. Imocac Manggac yengenaoc ngeneac songo negende. <sup>28</sup>Ni Manggacaru hama bangecfu mayai nga monggoc bangec wama Manggacaru dzigene kembade.”

<sup>29</sup>Ifi deu medacfora yeneng degec, “Negenna, ge yaguc yoac mi heima didiu denec.” <sup>30</sup>Amma wiac sasawa negendacnec, imoc yaguc negendimbe. Ge mongngo kpesigengge cdeac mi obohonecac amma ge Anutuarunac hanec, imoc negensinggedimbe. <sup>31</sup>Ifi degec Yesungo medacfora yofi edeyunuec, “Ngeni yaguc negensinggedae.

<sup>32</sup>Negenggec, naso mong hade nga bic hadac imohai ngeni ni tembu cna wanuma ticpac tohoma sinsararang kpema tembu c tembu c amanginasoc kengge cde. Nga tembu cna mi kecbade, nocac Manggacngo nigoc kefude. <sup>33</sup>Ngeni nearu ruaegoc kege cdeac yoac yoc edengunuduae. Nga ngeni bangectoa bangec yomohai kpendzeng kpema kege cde. Nga ni bangec yomoc bic feraheaiac ngeni ubangina kuha mi mabeso.”

**17** <sup>1</sup>Yesungo yoac imoc dema kiwa kurumennu fiu enu yofi numuec, “Manggac, naso bic hadac. Ge medacgaac kuc nga kibikperagi ngicngac mekperagiyemmena. Ge ifi anna Medacngo ifingoc geac kuc nga kibikperagi ngicngac mekperagiyemmeude. <sup>2</sup>Geng bangecngicngac sasawa yeac kuc bageau faiyununec. Nga yeac areng denec yeng kekecseri yemmeudeac yeni yeac bageau kege cdeac uayoac nga kuc ye minec. <sup>3</sup>Anu yeni Anutu mocgungo fora ke cde amma yeng Yesu Kristo sueu maec negennuruge cde, imocngo kekecseriac hania. <sup>4</sup>Ni ua me badeac denennec, imoc mesiai amma geac kuc nga kibikperagi

bangecfu mekperagiyemmeai. <sup>5</sup>Manggac, bangec nga kurumeng mi fingecmaecngoc ni geac kicfu kuc nga kibikperaginagoc kefai, ge kuc nga kibikperagina imoc nenna.

<sup>6</sup>Manggac, ge geanggaoc ngicngacfogca bangec yomohacnac meisingyununa geac kpacga mekperagiyemmeai. Yeni geac ngicngac kecgec geng yeni nennec nga yeneng yoacga tofohoma kecgec. <sup>7-8</sup>Amma enacyoac nennec, imoc bic yemmeba megec. Imocac yeni wiac sasawa gearunac hau nennec, imoc negendae. Nga geng suenuna gearunac hayai, imoc ifingoc yaguc fora yombong negendae.

<sup>9</sup>Imocac yeneac numugenduae. Bangectoa bangec yomocac ngicngac yeneac mi numuduae, kpac. Ni geng ngicngac nennec, yeneac amma numugenduae nocac yeni geac ngicngac areng <sup>10</sup>nga neac wiac sasawa imoc geac nga geac imoc neac. Nga ni yeneac kekecfu kuc kibikperagigoc mema kecduae. <sup>11</sup>Kekecnasona bangecfu wisickebeso ammanu yeni bangecfu kecmagec neng gearu habade. Kpetiac Manggac, nerang mocgu nga ifi isoc yeneng mocgu anggecdeac geng kpacga nennec, imoc arennu yenenggareng ambesena. <sup>12</sup>Neng yenigoc kefai, naso imohai kpacga nennec, imocngo garengyunuma onggongyunuba ngic mongngo mi sufuec. Yenearunac mocgusac, hofeac medac, yeng manganeeac. Mitikibiu yoac fede, imoc hafoangoc fora fingerudeac ifi fingerec.

<sup>13</sup>Anu neac feac feacngo yenearu sokodarudeac amma yoac sasawa yomoc bangec yomohaingoc dekperagima yaguc gearu habade. <sup>14</sup>Ni enacyoacga yemmeai. Amma yei kuriha kecduaeac bangectoa bangec yomocac ngicngac yeneng ubango ukunugec nga siriha imocngoc yeni kuric kecdaeac bangectoa bangec yomocac ngicngac yeneng yeni ubango ukuyunugec. <sup>15</sup>Ge bangecfunac meicyununadeac mi numugenduae, kpac. Manganaac minginango memayunubacac geng kaso ayemmebesena, imoc numugenduae. <sup>16</sup>Ni bangectoa bangec yomohanac kpac nga yeni ifi isocngoc yomohanac kpac. <sup>17</sup>Geac yoac imoc fora amma imocngo kpetiac kekecfu meyadiyunubeso. <sup>18</sup>Nga geng ni bangectoa bangec yomohai suenunec, ifi isocngoc neng yeni bangecfu sueyunuduae. <sup>19</sup>Yeni yoac forau kecma kpetiac kecgecdeac neng yeneac amma kpetiac kekecfu kecduae.

<sup>20</sup>Anu ni yeneacsac mi numugenduae. Nga enacyoacga degec ngicngac yeneng imoc negemma negensinnugecde, yeneac momoc numugenduae. <sup>21</sup>Yeni sasawa mocgungoc anggecde nga geng suenunec, imoc ngicngac bangectoa bangec yomohai negensinggegecdeac yeneac yofi numugenduae, Manggac, ge neac hereu kecnec nga neng geac hereu kecduae, siriha ifingoc yeneng nerang here manau kecbisia. <sup>22</sup>Nerang mocgu kecdipe, ifi isoc yeni mocgu kecgecdeac amma geng kuc kibikperagiagoc nennec, imoc bic yemmeai. <sup>23</sup>Yeni mocgu yombong kecgecdeac neng herenginau kecba geng neac hereu kecnade. Ifi fingeru

bangectoa bangec yomocac ngicngac yeni geng suenuna mayai, imoc negentegecgede. Nga ge neac songo negennec, ifi isoc yeneac songo negengkecne, imoc ifingoc negentegecgede.

<sup>24</sup>Manggac, bangec nga kurumeng mi fingecmaec ge bic heresongogoc hoannuma kuc nga kibikperagi nennec. Nga ngicngacfocna nennec, yeni neac kuc kibikperagiagoc imoc henggedeac neng kecbade, imohaingoc nenahafoc kecnideac anende. <sup>25</sup>Faka dindingacac Manggac, bangecngic yeneng ge mi negenggugec neng ine negengguai. Nga geng ni suenuna mayai, neac ngicngacfocna imoc bic negendae. <sup>26</sup>Geng ni songogoc hoannunec, songo imocngo yeneac hereu feude nga ni herenginai kecbadeac neng geac kpac bic dekperagiyemmeai amma dekperagiyemm ebade.”

**18** <sup>1</sup>Nunumu wisickeu Yesungo medacfora yenigoc mekemma Kidrong doku ferecgema noboc yufu ua mong feec, ihai kemma enggec.

<sup>2</sup>Nga Yesungo medacfora yenigoc naso homac imohai kpeturanggekecgecac Yuda ye Yesu docfu faiu megede, yeng ifingoc yufuua imoc negenec. <sup>3</sup>Ye ifi negemma womong gareng enara nga farisaio yeneac wasaingic amma keracnatang meyunuu haec. Hama yenahafoc kifa hania hania nga yareac wiac goa momoc mekenggec.

<sup>4</sup>Anu Yesungo faka fingecmiude, imoc bic negendarecac amma yenearu wegenac kemma yofi kpesiyemmeec, “Ngeni merac hofocdae?” <sup>5</sup>Kpesiyemmu degec, “Yesu Nadzaretengic, ye hofocdimbe.” ifi degec Yesungo yofi deec, “Imoc ni.”<sup>j</sup> Ifi demanu Yuda Yesu doc meec, yeng yeneac botucfu nanec. <sup>6</sup>Nga Yesungo yofi deec, “Imoc ni.” imohai yeni ngade ngade kemma bangecfu makpegec. <sup>7</sup>Kpéfemagec monggoc kpesiyemmeec, “Ngeni merac hofocdae?” deu degec, “Yesu Nadzaretengic.” <sup>8</sup>Ifi degec Yesungo yofi merenec, “Ni bic edengunudua, imoc ninoc. Ngeni ni hofocnudaeu naric medac yomoc wayunugec kembisia.” <sup>9</sup>Nga Yesungo yoac bic deec, imocngo hafaogoc fora anudeac torokpema yofi deec,

“Ge ngic nennec, yenearunac mong mi waba sufuec.” (Yohane 6:39)

<sup>10</sup>Anu Simong Petoro yeng wasaibeang mong ameagoc mekefec, imoc kpedzima imocngo womong gareng enaraac wanacngiha kpara Mariku, ye kpema kedzaha foiaugeng herecgeec. <sup>11</sup>Herecgeu Yesungo Petoro yofi edeac, “Ge beangga ameau faina kemeu. Manggacngo kpendzenggac sokoc nenec, imoc nedacbesare.”

<sup>12</sup>Anu wasaingic nga enara amma yudangic yeneac keracnatang yeneng Yesu mendanggema maria dzegema <sup>13</sup>hanahema Hanasiaru

<sup>j</sup> 18:5 “Imoc ni” imoc Anutuac kpac mong Miti eseau yemmemmea. Ge yoac goaac dedekperagi imohai henna. Hafac 1128.

mekenggec. Nga Hanasi kpegea Kaifa ye kifanaso imohai womong garengtoa kefec. <sup>14</sup>Nga “Ngic mocgungo ngicngac areng yeneac amma homeude, imocngo ngereeu de.” Imoc Kaifango yudangic bic dederecge ayemmu feec.

<sup>15</sup>Yeni Yesu mekemmagec Simong Petoro nga medac ogea mong, yeri Yesu modaroc. Modarec medac imocngo womong garengtoa negemmiecac yeri Yesu modacma womong garenggtoaac ama imocac oda manaungoc enec. <sup>16</sup>Enu Petoro ye ine oda naguac ngadeau nanec. Nammanu medac ogeango womong garengtoa negemmiec, yeng mama nagugareng ngac nagu nanec, ye edema Petoro hesickeu oda manau enoc. <sup>17</sup>Emmaec wanac naroang nagugareng nanec, yeng Petoro kpesimiec, “Ge ifingoc ngic mehadau, yeac medac me?” deu Petorongo deec, “Ni imoc kpac.” <sup>18</sup>Nga ama nomang anecac wanacngic nga keracnatang yeneng hama gerecmosora kpedzucnema figec wewengaima feu sebingina megec gereeu nanggec. Nammagec Petoro ye ifingoc sebia meu gereeu deac hama botucnginau nanec.

<sup>19</sup>Anu womong garengtoango Yesu medacforaac nga yengena kpoukpou uayaac dekpesi ammiec. <sup>20</sup>Ifi ammiu Yesungo yofi meremmiec, “Ni didiu bangecfu ngicngac yoac edeyunukecma yoacna nasosoc kpekpeturang amanginau amma womongtoanginau dekefai. Nga yudangic sasawa kpeturanggeandae, imohai dema sufuu sufuu mong mi deai. <sup>21</sup>Nga geng nocac imoc kpesinennec? Ngicngac yoac deba negenggec, yeni kpesiyemmena. Negenghenna, yoac deai, yeneng negendae.” <sup>22</sup>Ifi deu keracnatang yeneanunac mong wegenac nanec, yeng Yesu kpepatanggema yofi edeac, “Ge noc sinnu namma womong garengtoaac yoac turunga ifi meremminec?” <sup>23</sup>Ifi deu Yesungo yofi meremmiec, “Ni yoac mong mangana deduae, imoc dekperagina me fora deduae nocac nudang?” <sup>24</sup>Ifi deu Hanasingo Yesu witihaogoc sueu womong garengtoa Kaifa, yearu mekenggec.

<sup>25</sup>Anu Simong Petorongo sebia meu gereeu nammanu yeni kpesimigec, “Ge medacfora yeneac arenunac mong me?” ifi degec, yeng sebi heima deec, “Ni kpac.” <sup>26</sup>Ifi deu womong garengtoaac wanacngic mong, ye Petorongo kedzaha herecgeec, yeac arenunac, yeng deec, “Ge yufu uau yegoc tacna neng genai.” <sup>27</sup>Ifi deu Petorongo monggoc busic kpeu imohaingoc kokorecngo arohoec.

<sup>28</sup>Wereckengau yeni Yesu Kaifaarunac wasaingic oda manau kecandae ihai mekenggec. Nga womong gareng yeni Anutuac kicfu wonongnginagoc amma makekenggac ramamedaha mi nebinggac dema ine oda manau mi enggec. <sup>29</sup>Ifi anggec Piratongo sobennu mama kpesiyemmeec, “Ngeni ngic yomoc noc haniaac yoacfu faidae?” <sup>30</sup>Ifi deu yeneng turunga meremmigec, “Ye faka mangana mi ambac dede gearu mi faibing.” <sup>31</sup>Ifi degec Piratongo yofi edeyunuec, “Ifi anu ngeni

mekemma ngenang singngina modacma fakaya isinggema desigec.” Ifi deu yudangic yeneng degec, “Neni ngic mong kpeni homeudeac kuc mi metacdimbe.” <sup>32</sup>Yesungo warac yengena home homeac sing deec, imoc hafoangoc fora anudeac faka imocnoc fingerec.

<sup>33</sup>Nga Piratongo oda manau monggoc emma Yesu kpacma kpesimiec, “Ge yudangic yeneac ngictau me?” <sup>34</sup>Ifi deu Yesungo yofi meremmiec, “Ge yoac imoc geanggaoc denec me goango neac edegudauac denec?” <sup>35</sup>Ifi deu Piratongo yofi meremmiec, “Ni yudangic kpac. Geangga ngicngacfocga amma womong gareng enara yeneng nearu faigudau. Nga geng noc faka annec?”

<sup>36</sup>Ifi deu Yesungo yofi merennec, “Neac eucerereng imoc bangectoa bangec yomohacnac kpac. Imoc yomohacnac ambac dede ni yudangic yeneac mariu mi fainugecdeac enac tofoc tofohofocna yeneng neac amma yenigoc ewekpekpe ambau. Nga neac eucerereng imocngo bangec yomohacnac kpac.” <sup>37</sup>Ifi deu Piratongo deec, “Fora, ge ngictau mong me?” ifi deu Yesungo yofi merenec, “Geng neac ngictau mong denec. O, ni ua imoc mebadeac fingeema yoac fora imocac hepuc amma imoc dekperagibadeac bangectoa bangec yomohai mayai. Nga ngic mong ye yoac foraac arennu kecde, yeng neac ubaudumennaac kedzac kpeude.” <sup>38</sup>Ifi deu Piratongo deec, “Nga nocngo yoac fora ande?”

Ifi dema monggoc Yuda yenearu dzigene mama yofi edeyunuec, “Ni yeac kopocsic mong mi meficgeduae. <sup>39</sup>Ni ngic mocgu makekenggac hombannu witicamaunac faingemmeba maande, faka ifi fedeac yudangic ngictaungina faingemmeba maudeac angemmede me?” <sup>40</sup>Ifi deu yeni monggoc kucgoc yombong arohogec, “Ngic ye kpac, Baraba ine faina mabeso.” Nga Baraba ye ine yarengic.

**19** <sup>1</sup>Anu Piratongo deu wasaingic yeneng dzikacngo Yesu kpema sebia kperec merecge kpegec. <sup>2</sup>Kpema somang batihema ngickunenggac ira isoc mengerema oruhau gborockegec. Nga yeni ngakpi mong herea giweng giweng heimigec kemeec. <sup>3</sup>Ifi amma hoangau hama degec, “Ohec, yudangic yeneac ngictau.” Ifi dema kpekpepetang ammigec.

<sup>4</sup>Anu Piratongo monggoc ngadeau mama deec, “Negenggec, ni ngic yeac kopocsic mong mi meficgeduae, imoc negenggecdeac amma wangepma maduae.” <sup>5</sup>Ifi deu Yesungo ngakpia giweng giweng nga iraya waeagoc, imoc tacmanungoc mama nanu Piratongo deec, “Ngeni ngic yomoc henggec.” <sup>6</sup>Ifi deu womong gareng enara nga keracnatang yeneng ye hemma kpacgec, “Mariponnu kpegec, mariponnu kpegec!” ifi degec Piratongo deec, “Ni yeac kopocsic mong mi meficgeduaeac amma ngenaoc wangepma kemma mariponnu kpegec.” <sup>7</sup>Ifi deu yudangic yeneng meremma degec, “Ye yengena sebia meemma ni Anutuac medac deec, imocac neni dedeseriyoacnina fede, imohai namma ye homebeso, ifi dedimbe.”



<sup>8</sup> Ifi degec Piratongo negemma monggoc damukpeec. <sup>9</sup> Damukpeu ye oda manau monggoc emma Yesu kpesimiec, “Ge dahacnac yombong?” ifi deu Yesungo turunga mong mi merenec. <sup>10</sup> Ifi anu Piratongo monggoc kpesimiec, “Ge neac yoac turunga nocac mi merenec? Ni naric mesigubade nga mariponnu naric gubade, imocac uayoac nga kuc nearu fede, ge imoc mi negennec me?” <sup>11</sup> Ifi deu Yesungo meremma yofi edeec, “Ge kuc imoc wihacnac mi genggena dede geanggaoc naric mi memanubang. Imocac yofi ande, ngic geac mariu fainudac, yeac kopocsicngo geac ferahede.”

<sup>12</sup> Ifi deu imohaingoc Piratongo Yesu dafi kenudeac negensimanu yudangic yeneng kpacgec, “Ge ngic imoc wana kenudeu Sisaac ogea mi kecnade. Mong ye yengena meemma yofi dede, ‘Ni ngictau.’ ye Sisa emmiude.” <sup>13</sup> Ifi degec Piratongo imoc negemma Yesu wau kenudeac sing hoforec. Hofocma Yesu wangeru ama ngadeau mama bangecbisic botuha mong kpara Hocdzake, ihai desi desitacafu emma tarec. Bangecbisic imoc hebiraio yoacfu kpara Gabata.

<sup>14</sup> Anu makekeng nasoac efac kpefac amma yaka kpedzucnegec femanu 12 kiroc wegenu Piratongo yudangicngac yofi edeyunuec, “Ngeni ngictaungina henggec.” <sup>15</sup> Ifi deu yeni kpacgec, “Meickena, meickema mariponnu kpena homeu!” Ifi kpacgec edeyunuec, “Ni ngictaungina mariponnu kpeba homeudeac negendae me?” Ifi deu womong gareng enara yeneng meremma degec, “Ngictaunina imoc Sisa, mong mi kecde, kpac.”

<sup>16</sup> Ifi degec Piratongo mariponnu kpegecdeac maringinau faiec. <sup>17</sup> Faiu Yesu yengenaoc mariponga tofohou bangec buma mong kpara Hatasic degec nga hebiraio yoacfu Gorigata, imohai mekenggec. <sup>18</sup> Imohai kemma Yesu mariponnu kpegec. Nga yegoc ngic yohockang noboc nga noboc Yesu botucngirau, ifi yunugec.

<sup>19</sup> Anu Piratongo yoacbuma mong yofi ohoma mariponnu faiu nanec, “Yesu Nadzaretenc, yudangic yeneac ngictau.” <sup>20</sup> Anu Yesu mariponnu kpegec, bangecbisic imoc amatoa wegenacfu feecac amma yudangicngac homacngo kibi imoc osogec. Kibi imoc hebiraio yoacfu nga latingyoacfu amma grikyoacfu oho ohoya nanec. <sup>21</sup> Ifi oho ohoya femanu yudangic yeneac womong gareng enarafocngina yeneng Pirato yofi edegec, “Yudangic yeneac ngictau, ifi mi ohona. Ngic yomoc yengenaoc deec, ni yudangic yeneac ngictau, ge ifi ohobesena.” <sup>22</sup> Ifi degec Piratongo deec, “Yoac ohoduae, imoc ohoduanoc.”

<sup>23</sup> Anu wasaingic yeni Yesu mariponnu kpegec nanu wambaya mema mederegec, yohoc nga yohoc anu sokoma megec. Nga ngakpia imoc susuic dzuhura kpac, <sup>24</sup> yeni imoc hemma denengeng amma degec, “Nenang yomoc mi mesuckema meracac anudeac kpeing kpeni.” Anutuac yoac hafaogoc fora fingerudeac wasaingic yeni ifi anggec. Yoac yofi oho ohoya fede,

“Yeneng wambana mederema ngakpina megecdeac kpeing kpegec.”

*(Mitiyegec 22:18)*

<sup>25</sup>Anu Yesuac nonggonasia yeri nga Keropaac enema Maria amma Maria kpara mong Madara, yeneng Yesuac mariponnu wegenac kemma nanggec. <sup>26</sup>Nammagec Yesungo songomedaha henu nonggeagoc wegenac nanec yeremma nonggea yofi edeec, “Nenggac, imoc geac medacyombongga.” <sup>27</sup>Ifi dema medac, ifingoc edeec, “Medac, imoc geac nonggoga.” Ifi deu medac ye imohaingoc Yesu nonggea yegoc kefudeac wangeru ameau kenoc.

<sup>28</sup>Uana mesidacdua, Yesungo imoc negemma yoac mitikibiu oho ohoya fede, imoc hafoangoc fora fingerudeac yofi deec, “Ni dokuac anende.” <sup>29</sup>Ifi deu bokong mong waing aengagoc wake wakea nanec, yeni kondung sobing mong imohai mema wainnu nemuruckema babacmeacfu dzegema faigec Yesuac enarau enec. <sup>30</sup>Enu Yesungo waing imoc nema yofi dema arohoec, “Ni uana bic mesidacdua.” Ifi demanu ubea sorohoma mau asuya yaru homeec.

<sup>31</sup>Uameme imoc makekenggac efac kpefacac naso anec. Nga yudangic yeneng ngic mariponnu yunugec, yeneac farengngina sabata nasou mariponnu mi nambeso negenggec. (Sabata naso imocngo hombang kuneng yombong.) Imocac amma wasaingic yeneng mariponnu ngic haningina kpetackema mesiyunugecdeac Pirato kpesimigec. <sup>32</sup>Kpesimigec wasaingic yeneng hama ngic Yesugoc mariponnu yurugec, yereac haningira monggac hanahema kpetackema monggac ifingoc kpetackegec. <sup>33</sup>Kpetackema Yesuaru hama henggec, ye bic homeec, ifi anu hania mi kpetackegec. <sup>34</sup>Nga wasaingic mongngo ine sangarango Yesuac pandzenga nembareckeu sac nga doku imohacsing maec. <sup>35</sup>Ngeni ifingoc faka fingerec, imoc negensinggecdeac amma ni kicnango hendarai nga imoc dekperagiduae. Amma ni wiac dekperagiduae, imocngo fora ande, imoc negenduae.

<sup>36</sup>“Yeni sira mong mi kpetackegecde.”

*(Makekeng 12:46; Bangec kisiu 9:12; Mitiyegec 34:20)*

Yoac yomocngo mitikibiu oho ohoya fede, imoc hafoangoc fora fingerudeac ifi fingerec.

<sup>37</sup>Mitikibiu yoac mong yofia fede,

“Nembareckegec, ngic imoc yeni kicnginango henggecde.”

*(Dzekaria 12:10)*

<sup>38</sup>Imoc wisickeu ngic mong kpara Yosefe Arimatianac, yeng Piratoaru kemma Yesuac fareng mesiudeac kpesimiec. Kpesimiu Piratongo desiu Yosefengo kemma Yesuac farenga mesiec. Imoc yofiac, ye Yesuac medac anu ye yudangic yeneac kengec kpeu fingectegecma mi kefec. <sup>39</sup>Nga Nikodemo, ye warac tofocnac Yesugoc yoac yoac anoc, yeng ic sopea homuna gombunga ebiha 30 kiroacsoc, imoc mehaec. Sopo yereac

kpacngira mira nga aroe, imocngo yerec yerecgea. <sup>40</sup>Yeri imoc mehama yudangic yeneac fareng tonggo tonggoac faka modacma farenga mema spongo kpedanggema lineng kporucngo tembonggeoc.<sup>k</sup> <sup>41</sup>Anu yeri Yesu mariponnu kpegec, bangec botuc imohaingoc ua mong feec, ua imocac manau kedzebe mong gboria ngicngo memea nanec. Nanu kicsere ngic mong warac mi faigec, imohai faioc. <sup>42</sup>Yudangic yeni imohai hombanggac efac kpefac anggec nga kicsere imoc wegenac feecac Yesuac farenga imohai faioc.

**20** <sup>1</sup>Sonda gboria uameme hanac hanaheau ama werec wereckenggac Maria Madarango kicsereu kemma kedzebe naguac hoctoa, imoc meic meickea henec. <sup>2</sup>Ifi hemma monggoc nedzikemma Simong Petoro nga medac mong, Yesuac songomedaha, yeri edeyuruc, “Yeni Kebu kicsereunac meickema dahaigeng faidau, imoc mi negendimbe.”

<sup>3</sup>Ifi deu Petoro nga medac ogea yeri kicsereu kemma <sup>4</sup>yerahafoc sinnu nedzikemma medacogeango kucgoc nedzima Petoro ferahema yeng bic kicsereu kensikeec. <sup>5</sup>Kensikema okarima henu kporucusu tembonggegec, imocngosac tarec. Nga ye manau ine mi enec. <sup>6</sup>Simong Petoro ye ngade hama kicsereu emma henu kporucusu imoc tarec. <sup>7</sup>Kporucusu oruhau kperahagec, imocngo tembuha kporuc tosea kpou faifaiango imocgoc mi tarec, ifi henec. <sup>8</sup>Ifi hemma nammanu medacogea waraima kicsereu kenec, yeng ifingoc kicsereu emma imoc hemma negensinggeec. <sup>9</sup>Imoc yofiac, Yesu homecfunac yacheso, imocac mitikibiu oho ohoya fede, yeri imoc warac mi ireckemangoc <sup>10</sup>dzigenema amangirau kenoc.

<sup>11</sup>Anu Mariango kicsere ngadeau namma kiarec. Kiacmangoc okarima kicsereu kic fima henec. <sup>12</sup>Henu angero yohockang yeri ngakpiherecngira kongac kongac yerenec. Yerenu Yesuac farenga feecfu, mongngo oruhaugeng nga mongngo haniaugeng, ifi taroc. <sup>13</sup>Tacma kpesimioc, “Ngac, ge nocac kiacnec?” kpesimiec Mariango merenec, “Yeni Kebunaac farenga meickema dahai faidauac obohoma kiacduae.” <sup>14</sup>Ifi dema dzigene henu Yesungo ngadeau nanec. Nanu Yesungo nande, imoc mi hentegegeru <sup>15</sup>Yesungo yofi kpesimiec, “Ngac, ge merac hofocma kiacnec?” deu negenec, “Ua minginango kpesinende.” ifi negemma deec, “Kunenna, geng Yesuac farenga meickema monnu faidang isoc edenuna kemma meba.”

<sup>16</sup>Ifi deu Yesungo yofi deec, “Maria.” ifi deu dzigenema “Rabbouni.” deec. (Arama yoacfu Rabbouni, imocac titiha kpoukpouna.) <sup>17</sup>Nga Yesungo yofi edeec, “Mannaaru mi enduangoc, imocac mi kpeserenuna. Ge kemma tosofocna yofi edeyununa, ‘Ni Manna nga ngeneac Manggac amma neac Anutuna nga ngeneac Anutu, yearunoc embade.’” <sup>18</sup>Ifi deu

<sup>k</sup> 19:40 Lineng imoc kpindzing mong ambiac ogea, imocngo wamba mekecgec.

Maria Madarango medac yenearu kemma Yesu henec nga yoac edeec, imoc edeyunuec.

<sup>19</sup>Uameme imohaingoc ama bic toforemanu Yesu medacfora yeni yudangic yeneac kengecyunuu amangina nagu heima kpetinggema tacgec. Tacmagec Yesungo hama botucnginau namma yofi edeyunuec, “Ruae ngenearu febeso.” <sup>20</sup>Ye ifi dema maria nga pandzenga edzacyunuec. Edzacyunuu medacfora yeni Kebu hemma sogaiגע. <sup>21</sup>Nga Yesungo monggoc yofi edeyunuec, “Ruae ngenearu febeso. Mannango suenuu hayai, neng ifi isocngoc ngeni suengunuduae.” <sup>22</sup>Ye ifi dema enacasuya fifiyemmema yofi deec, “Ngeni Tiri Asu meגע.” <sup>23</sup>Ngeni ngic yeneac kopocsic wayemmeגעdeu kopocsicngina kpac anude. Nga ngeni kopocsicngina witickeגעdeu kopocsicnginaac witicfu keגעdeגע.

<sup>24</sup>Medac 12 yeneac botucfunac mong kpara Toma, Tombosonga deגע, yeng Yesungo medacfora fingecyemmec, naso imohai mi tarec. <sup>25</sup>Imocac medac ogofora yeneng edegec, “Neni Kebu hending.” deגע Tomango deec, “Ni kicnango biringngo kpeגע mi hembade nga gbonnango maria titingau mi faibade amma pandzengau marinango mi faiba enudeu imoc naric mi negensingebade.”

<sup>26</sup>Ifi deu uameme 8 imocac ngadeau Yesu medacfora nga Toma yenahafoc monggoc emma tacgec. Yeni nagungina heima kpetinggema tacmagec Yesungo botucnginau fingecma namma yofi deec, “Ruae ngenigoc febeso.” <sup>27</sup>Ifi dema Tomaac yofi deec, “Toma, gbongga sinena marinaac titingau enu nga kicgango henna. Amma mariga sinena pandzennau enu negengyohoc wama negensingena.” <sup>28</sup>Ifi deu Tomango deec, “Ge Kebuna amma Anutuna.” <sup>29</sup>ifi deu Yesungo yofi edeec, “Ge kicngo nendanggac negensingenec. Nga ngic mong ye kicngo mi hemma negensingeude, ye kenehagoc.”

<sup>30</sup>Yesungo medacfora yeneac kicfu ngicngac yeneng negensingegecdeac faka kuhagoc homac mekenec, imoc kibi yomohai mi ohodara. <sup>31</sup>Nga Yesu ye Messia Anutuac medac, ngeni imoc negensinggema kecec yeac kpacfu mekeגעdeac kibi yomoc oho ohoya fede.

**21** <sup>1</sup>Imocac ngadeau Yesungo Tiberia dzohonnu medacfora monggoc fingecyemmec. Imoc yofi fingerec, <sup>2</sup>Simong Petoro nga Toma Tombosonga dekeגע amma Natanae Gariraia bangecfu Kanang taonnunac nga Dzebedaioc medahora amma Yesuac medacfora yenearunac ngic yohockang, yeni yenahafoc tacgec. <sup>3</sup>Tacma Simong Petorongong ofora edeyunuec, “Ni kondungyanggac kembadeac negenduae.” Ifi edeyunuu deגע, “Neni gegoc momoc kennide.” Ifi dema yenahafoc gombau emma kemma tofocnac imohai kondungyang mong mi meגע.

<sup>4</sup>Wiac mong mi mekecmagec ama wereckenu Yesungo dzohong tegiau nanec. Nanu yeni Yesungo nande, imoc mi hensigec <sup>5</sup>Yesungo yofi

kpesiyemmeec, “Medacfozna, ngeni kondungyang mong medau me kpac?” deu yeni degec, “Kpac.” <sup>6</sup>Ifi degec yeng yofi edeyunuec, “Ngeni ufcngina gomba foiaugeng ukugec kemeu goa meficgegede.” Ifi deu yeni deec imoc modacma ufcngina ukugec kemeu kondungyang ebiriango yombong ufcfu kemegecac kpedzibibiema wagec. <sup>7</sup>Nga Yesuac songomedacngo Petoro edeec, “Imoc Kebunoc.” ifi deu Simong Petorongo negemma sebiasac nanecac ngakpia heima gombaunac yuma dzohonnu kemema waraiyemmeec. <sup>8</sup>Nga medacfora goa dzohong tegiaugeng 100 mitaacsoc hereau mi tacgecac yeni gombau namma ufcngina kondungyangagoc kpedzi kpedzi kenggec.

<sup>9</sup>Kensikema tegiau emma henggec ic sogong goa nga kondungyang gerecyohocfu tarec. <sup>10</sup>Ifi taru Yesungo yofi deec, “Ngeni kondungyang goa yaguc medau, imoc mehagec.” <sup>11</sup>Ifi angec Simong Petorongo tembuha gombau emma ufc kpedziu tegiau enec. Nga imoc kondungyang kuneng kunengngo wakema kpetengina 153 imocacsoc anec nga ufcngo sifu mi tegerec. <sup>12</sup>Nga Yesungo yofi edeyunuec, “Ngeni hama menegec.” ifi deu medacfora kengecyunuu yeneacunac mongngo, ge merac dema, mi kpesimigec. Imoc Kebunoc, yeni ifi bic negenggec. <sup>13</sup>Nga Yesungo gerec kiwau hama ic sogong mema yemmema kodungyang ifingoc mema yemmeec. <sup>14</sup>Yesungo homecfunac yarec, naso imohai medacfora fingeeyemmeec, imoc atac harebec anec.

<sup>15</sup>Anu yaka negec wisickeu Yesungo Simong Petoro yofi kpesimiec, “Simong Yohaneac medac, ge neac songo heregoc negennec, imocngo tosofocga yeneac ferahede me?” ifi deu Petorongo deec, “O, Kebu ni geac heresongo negenduae, ge imoc bic negennec.” Ifi deu Yesungo yofi deec, “Ge ramafozna medaha yaka gumecyunubesena.” <sup>16</sup>Dema Yesungo monggoc deu atac yohockang anec, “Simong Yohaneac medac, ge foracngoc neac songo heregoc negennec me?” deu Simongngo deec, “O, Kebu ni geac heresongo negenduae, imoc bic negennec.” ifi deu Yesungo yofi deec, “Ge ramafozna yeneac gareng kecbesena.” <sup>17</sup>Dema Yesungo monggoc kpesimiu atac harebec anec, “Simong Yohaneac medac, ge neac songo heregoc negennec me?” Yesungo kpesimiu atac harebec anu Petoro ye negengebirima Yesu yofi edeec, “Kebu, ge wiac sasawa negendacnec. Ni geac heresongo negenduae, imoc bic negennec.” ifi deu Yesungo yofi edeec, “Ge ramafozna meyunuma yaka gumecyunubesena.”

<sup>18</sup>“Ni fora yombong edeguduae, ge sebigbori kecma geanggaoc wambaga faima songoga modacma kengha angannec. Nga ge kpengeng annade, naso imohai mariga miacna ngic mongngo wamba heigemma songoga mi fede, imohai megu kemma faigugecde.” <sup>19</sup>Petorongo homehau siric dafi homema Anutu dengereude, Yesungo imocac heabima deec. Amma monggoc edeec, “Ge hama modacnuna.”

<sup>20</sup>Yesungo ifi deu, Petorongo dzigenema Yesuac songomedaha henu yeng yeri modacyuruec. Ngic modacyuruec, yeng warac yaka negec,

naso imohai Yesuac mondacfu heima merang doc meudeac kpesimiec.

<sup>21</sup>Nga Petorongo medac imoc hemma Yesu kpesimiec, “Kebu, ge yeac dafi negennec?” <sup>22</sup>Ifi deu Yesungo yofi edeec, “Ni songona andeu yeng kecmanungoc dzigene habade, imocngo ine geac wiac mi ande. Ge eng hama modacnuna.” <sup>23</sup>Ifi deu tosofora botucnginaunac yofi netohogec wakeec, “Medac imoc mi homeude.” Nga Yesungo mi homeudeac mi deec, kpac. Ye yofisac deec, “Ni songona andeu yeng kecmanungoc dzigene habade, imocngo geac wiac mi ande.” Yocac wisic wisickea

<sup>24</sup>Medaha imoc ninoc. Ni wiac yomocac hepuc amma dekperagima ohoai. Nga yoacna imoc fora, imoc negendimbe. <sup>25</sup>Yesungo wiac goa homac meec, ngic mongngo wiac imocac yocac sasawa kibiu ohodacbac imoc bangectoa bangec yomohai faifaiac titinga negemba mi fingebac.